

ASO FARAILE, 5 OKETOPA 2018

Na tauaofia le Fono Aoao Faitulafono i le itula e 9:00 i le taeao e tusa ai ma le Polokalame o Fonotaga a le Palemene 2018.

Na nofoia le Nofoa e le Fofoga Fetalai i le itula e 9:00 i le taeao.

Tatalo.

SAUNOAGA FAAFEILOAI A LE FOFOGA FETALAI

FOFOGA FETALAI: Ou te faasilasila atu ua amatalia nei Galuega ma Tualumaga a le Fono Aoao Faitulafono.

E avea ia lenei avanoa ou te faatalofa atu ai i lau Afioga i le Palemia faapea foi le Afioga i le Sui Palemia ma le mamalu o le auvaa o le Kapeneta faapea foi Minisita Lagolago ae a sui usufono mamalu o le Palemene i ona Taitaifono ma sui usufono o Komiti eseese. Ia, malo le soifua ua malo le lagi e mama aua le faataunuaina o le tatou galuega e ala i le tatou valaauina i lenei taeao. E faapea foi ona faatalofa atu i Faaululuga o Matagaluega ma Faaiapotopotoga eseese a le Maio aemaise foi o le Ofisa o le Fono ona o le mafai ona tatou faatasi e molimauina tualumaga ma galuega a le Fono Aoao Faitulafono.

FAAALIGA MAI LE TAITAI O LE MAOTA

Na fofogaina e le Fofoga Fetalai le Faaaliga mai le Taitai o le Maota.

E tusa ai ma le Tulafono Tumau 76 a le Palemene ua tuuina atu nei le Faaaliga i le Fono Aoao Faitulafono mo le iloiloaina o Tulafono Tau Faaofi ua faaaliga i inei:

1. Tulafono Tau Faaofi o Teuteuga o le Tulafono o le Ao o le Malo 2018.
2. Tulafono Tau Faaofi e Fuafua Tatau ai le Ava Malosi 2018.
3. Tulafono Tau Faaofi o Teuteuga o le Tulafono o Meatotino Tau le Atamai 2018.

TUUINA ATU i lenei aso Tofi, 4 o Oketopa i le tausaga 2018.

**(Sainia): Susuga Hon Tuilaepa Auelua Fatialofa Lupesoliai Lolofietele
Neioti Aiono Galumalemana Dr. Sailele Malielegaoi.
TAITAI O LE MAOTA.**

05 OKETOPA 2018

FAAALIGA MAI LE TAITAI O LE MAOTA

E tusa ai ma le Tulafono Tumau 100(2), ua tuuina atu nei le Faaaliga i le Fono Aoaofa Faitulafono mo le iloiloaina o le Tulafono Tau Faaofi ua taua i lalo i lona Tulaga Faanatinati.

1. Tulafono Tau Faaofi o Teuteuga o le Tulafono o Meatotino Tau le Atamai 2018.

TUUIINA ATU i lenei aso Tofi, 4 o Oketopa i le tausaga 2018.

(Sainia): **Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi.**
TAITAI O LE MAOTA

ISI FAASILASILAGA A LE FOFOGA FETALAI

FOFOGA FETALAI: Mo le silafia e le Maota lau Afioga i le Palemia ma le Kapeneta ma le mamalu o le Palemene, ua nofoia nei le Nofoga mo Tagata Lautele e Sui Auai o le Polokalame Faa-Palemene mo Kolisi Mauatuluga 2018.

E le toe tau faailoaina Polokalame Faa-Palemene o lo o faaauau pea lona faatinoina mo alo ma fanau aoga o le Atunuu. O le sini autu o lenei faamoemoe, ia o latou silafia la latou Palemene. O le faagasologa o lenei Polokalame, o le a maua avanoa e aoaoina ai i latou i matafaioi ma galuega fai a le Palemene aemaise o le auunaga lagolago a le Ofisa o le Failautusi o le Fono Aoaofa Faitulafono.

E avea ai lou leo e fai ma sui o lenei Palemene, e faatalofa atu ai i Susuga i Ulu Aoga ma aiga faiaoga aemaise o alo ma fanau ua filifilia mo le Polokalame Faa-Palemene Lona 6 mo Kolisi Mauatuluga 2018.

E faapea foi ona ou faasilasila atu; o lo o nofoia le Nofoga mo Tagata Lautele e sui o le au taaalo o le Samoa Youth Olympic Team o alo ma fanau o le a avea ma sui o le atunuu i taaloga faava o Malo o le a faia i le atunuu o Argentina.

E faapea foi ona avea lou leo e fai ma sui o le Palemene e momoli atu ai faamanuiaga ma moomooga alofa mo le au taaalo o le a alo atu i lea faamoemoe. O outou mama na. Ia pouliuli outou tino a ia malamalama pea outou ala.

05 OKETOPA 2018

SAUNOAGA O MALIU

Na faasilasila e le Fofoga Fetalai le tuumalo o nisi o tamalii sa avea ma sui usufono o le Palemene i tausaga ua mavae.

i) *O le Afioga PATEA Satini Epati sa tuumalo i le aso 21 Aokuso 2018.*

O le Afioga PATEA Satini Epati sa avea ma Sui Usufono mo le Itumalo Faaalaalafaga o Sagaga le Falefa i le Paeaiga Lona 13 (XIII) mai le tausaga 2001-2006. O ia o se Sui Tutoatasi.

Sa avea ma Sui Taitaifono o le Komiti o Mataupu Tau le Va i Fafo, ma Sui Usufono o le Komiti o le Soifua Maloloina ma le Va Fealoai ma le Komiti o Aoga.

ii) *O le Susuga Hon. KEIL, Hans Joachim, na tuumalo i le aso 31 o Aokuso 2018.*

O le Susuga Hon. KEIL sa avea ma Sui Usufono mo le Au Palota Taitoatasi mo le lima (5) Paeaiga sosoo, amata mai le Paeaiga Lona 10 (X) – Tausaga 1988 – 1991 seia oo i le Paeaiga Lona 14 (XIV) – Tausaga 2006 – 2011. O ia o se Sui o le Vaega Faaupufai e Puipuia Aia Tatau a Tagata (HRPP).

Sa avea o ia ma Minisita o le Matagaluega o Felauaiga i le Paeaiga Lona 11 (XI) mai le tausaga 1996 – 2001. Na toe tofia o ia ma avea ma Minisita o le Matagaluega o Fefaatauaiga, Pisinisi ma Alamanuia faapea le Ofisa o Tagata Tafafao Maimoa Mai Fafo i le Paeaiga Lona 12 (XII) mai le tausaga 2001 – 2006.

Sa avea o ia ma Sui o le Komiti o Talosaga mai le tausaga 1988 – 1991. Sa avea foi o ia ma Sui Taitaifono o le Komiti o Tulafono Tau Faaofi, Komiti o Talosaga ma le Komiti o Tulaga Aloaia i le tausaga 1991 – 1996. Sa avea o ia ma Sui Usufono o le Komiti o le Maota ma Sui Taitaifono o le Komiti o Pulega a le Malo i le tausaga 2006 – 2011. Sa avea foi o ia ma Failautusi Faa-Palemene mo le Matagaluega o Pisinisi, Alamanuia ma Leipa mai le tausaga 2006 – 2011.

Avea ia lou leo e fai ma sui o le Palemene e momoli atu ai faamaisega ma faamafanafanaga i Faletua, nofo-a-alo faapea aiga aemaise o itumalo pele, ona o le toesea ai o le Afioga PATEA Satini Epati ma le Susuga Hon. KEIL, Hans Joachim.

Na tutulai fifilemu le Maota mo le minute e tasi e faailoa ai lo latou faaaloolo i sui usufono ua tuumalo.

TUUINA ATU O PEPA

Na tolaulau e le Faikautusi Pepa nei ua faataatia i luga o le Laulau a Fono e tusa ai ma le T.T.49.

1. S.R. 2018/4, Tulafono o Auupega Malolosi 2017 – Faasilasilaga o le Amata Faamamaluina.
2. S.R.2018/5, Tulafono Faatonutonu o Totogifuapauina o Laisene Tau Fesootaiga 2018.
3. P.P.2018/2019 Nu.51, Lipoti Faaletausaga a le Auaunaga o Falepuipei ma le Toefuataiga 30 Iuni 2017.
4. P.P.2018/2019 Nu.52, Lipoti a le Komisi o le Toefuataiga o Tulafono a Samoa o le Toe Timata le Upega o Tulafono a Samoa Tesema 2017, Lipoti Faaiu 22/17.
5. P.P.2018/2019 Nu.53, Lipoti Faaletausaga a le Faalapotopotoga Malosi Faaletise 2016-2017.
6. P.P.2018/2019 Nu.54, Lipoti Faaletausaga a le Faalapotopotoga Inisiua Tau Soifua a Samoa 2017.
7. P.P.2018/2019 Nu.55, Lipoti Faaletausaga a le Ofisa o Fuainumera Faamauina 2016/2017.
8. P.P.2018/2019 Nu.56, Lipoti Faaletausaga a le Pulega o Felauaiga i le Lauelele 30 Iuni 2017.
9. P.P.2018/2019 Nu.57, Lipoti Faaletausaga a le Pulega o Tinei Mu ma Faalavelave Tutupu Faafuasei a Samoa 2016-2017.
10. P.P.2018/2019 Nu.58, Lipoti Faaletausaga Matagaluega o Fesootaiga ma Faamatalaga Tekonolosi 2016-2017.
11. P.P.2018/2019 Nu.59, Lipoti Faaletausaga a le Faalapotopotoga o Vaa a Samoa 2017.
12. P.P.2018/2019 Nu.60, Lipoti Faaletausaga a le Faalapotopotoga o Elelele a Samoa 2016/2017.
13. P.P.2018/2019 Nu.61, Lipoti Faaletausaga a le Matagaluega o le Va i Fafō ma Fefaatauaiga 2016/2017.
14. P.P.2018/2019 Nu.62, Lipoti Faaletausaga Ofisa Tausi Mavaega 2017.
15. P.P.2018/2019 Nu.63, Lipoti Ofisa Komesina o Sulufaiga Samoa i le Saililiga Lautele i Sauaga i Totonu o Aiga.
16. P.P.2018/2019 Nu.89, Lipoti Faaletausaga a le Matagaluega o Galuega, Felauaiga ma Atinae Eseeese 2016/2017.
17. P.P.2018/2019 Nu.91, Lipoti Faaletausaga a le Matagaluega o Tina ma Tamaitai, Atinae o Nuu ma Afioaga ma Agafesootai 2016/2017.
18. P.P.2018/2019 Nu.92, Lipoti Komiti o le Toefuataiga o Tulafono a Samoa i “Tulafono Faafoc o Taualumaga Faafaamasinoga tau le Va o Tagata” – Tulafono Faafoc o le Faamasinoga Maualuga 1980 ma Tulafono Faafoc o le Faamasinoga Faaitumalo 1971.

TUUINA ATU O LIPOTI A KOMITI FAA-PALEMENE

Na tolaulau e le Failautusi Lipoti a Komiti Faa-Palemene nei ua faataatia i luga o le Laulau a Fono e tusa ai ma le T.T.51(5).

1. P.P.2018/2019 Nu.64, Lipoti Komiti Tulafono Tumau i le P.P.2017/2018 Nu.100, Lipoti a le Komisi o le Toefuataiga o Tulafono a Samoa i le Pule a le Matai Sa'o (*Lipoti Faaiu 18/17, Fepuari 2017*).
2. P.P.2018/2019 Nu.65, Lipoti Komiti Tulafono Tumau i le P.P.2017/2018 Nu.156, Lipoti Faaletausaga a le Ofisa o le Komisi o Galuega a le Malo 2015/2016 & P.P.2018/2019 Nu.6, Lipoti Faaletausaga Komisi o Galuega a le Malo 2016/2017.
3. P.P.2018/2019 Nu.67, Lipoti Komiti Tulafono Tumau i le P.P.2018/2019 Nu.17, Lipoti Faaletausaga a le Matagaluega o Faamasinoga ma Pulega Tau Faamasinoga 2016/2017.
4. P.P.2018/2019 Nu.69, Lipoti a le Komiti o Tupe Maua ma Tupe Totogi i le P.P.2018/2019 Nu.4, Lipoti Faaletausaga a le Ofisa o le Pule Faatonu 2016/2017.
5. P.P.2018/2019 Nu.70, Lipoti a le Komiti o Tupe Maua ma Tupe Totogi i le P.P.2018/2019 Nu.7, Faamatalaga o Tupe a le Malo Samoa 2016/2017.
6. P.P.2018/2019 Nu.71, Lipoti a le Komiti o Tupe Maua ma Tupe Totogi i le P.P.2018/2019 Nu.13, Lipoti Faaletausaga a le Faalapotopotoga o Suesuega Faasaienisi a Samoa 2016/2017.
7. P.P.2018/2019 Nu.72, Lipoti a le Komiti o Tupe Maua ma Tupe Totogi i le P.P.2018/2019 Nu.14, Lipoti Faaletausaga a le Pulega o Faaputugatupe Teufaafaigaluega o Mavaega Tausi a Samoa 2016/2017.
8. P.P.2018/2019 Nu.73, Lipoti a le Komiti o Tupe Maua ma Tupe Totogi i le P.P.2018/2019 Nu.15, Lipoti Faaletausaga a le Iunivesite Aoao o Samoa 2016/2017.
9. P.P.2018/2019 Nu.74, Lipoti a le Komiti o Tupe Maua ma Tupe Totogi i le P.P.2018/2019 Nu.16, Fuafuaga o Atinae a Iunivesite Aoao o Samoa mo Vaitaimi 2017/2018 – 2010/2021.
10. P.P.2018/2019 Nu.75, Lipoti a le Komiti o Tupe Maua ma Tupe Totogi i le P.P.2018/2019 Nu.18, Lipoti Faaletausaga a le Auaunaga Faasoifua Maloloina 2016/2017.
11. P.P.2018/2019 Nu.76, Lipoti a le Komiti o Tupe Maua ma Tupe Totogi i le P.P.2018/2019 Nu.31, P.P.2018/2019 Nu.32, P.P.2018/2019 Nu.33 & P.P.2018/2019 Nu.34, Lipoti Faaletausaga a le Pulega o Faailoga ma Tusi Pasi Taualoga a Samoa 2013/2014, 2014/2015, 2015/2016 & 2016/2017.
12. P.P.2018/2019 Nu.80, Lipoti a le Komiti o Tupe Maua ma Tupe Totogi i le P.P.2018/2019 Nu.37, Lipoti Faaletausaga a le Matagaluega o Faalapotopotoga a le Malo 2016/2017.
13. P.P.2018/2019 Nu.81, Lipoti a le Komiti o le Vaega tau le Va Fealoai i le Tulafono Tau Faaofi o Teuteuga o le Tulafono o le Puipuiga mai Aafiaga o le Tapaa 2018.

05 OKETOPA 2018

**Tulafono Tau Faaofi o Teuteuga o le Tulafono o le Ao o le Malo 2018
– faitauga muamua**

14. P.P.2018/2019 Nu.82, Lipoti a le Komiti o le Vaega tau le Va Fealoai i le P.P.2018/2019 Nu.3, Lipoti Faaletausaga a le Matagaluega o Aoga, Taaloga ma Aganuu 2017.
15. P.P.2018/2019 Nu.83, Lipoti a le Komiti o le Vaega tau le Va Fealoai i le Tulafono Tau Faaofi o Teuteuga o le Tulafono o Aoga 2018.
16. P.P.2018/2019 Nu.84, Lipoti a le Komiti o le Vaega tau le Tamaoaiga i le P.P.2018/2019 Nu.8, P.P.2018/2019 Nu.9, & P.P.2018/2019 Nu.10, Lipoti Faaletausaga a le Matagaluega o Faatoaga ma Faigafaiva 2014/2015, 2015/2016 & 2016/2017.
17. P.P.2018/2019 Nu.87, Lipoti a le Komiti o le Vaega tau le Tamaoaiga i le P.P.2018/2019 Nu.11, Lipoti Faaletausaga a le Matagaluega mo Tupe Maua 2016/2017.
18. P.P.2018/2019 Nu.88, Lipoti a le Komiti o le Vaega o Atinae Eseese i le P.P.2017/2018 Nu.152, Lipoti Faaletausaga a le Pulega o le Suavai a Samoa 2016/2017.
19. P.P.2018/2019 Nu.90, Lipoti a le Komiti o le Vaega o Atinae Eseese i le P.P.2018/2019 Nu.5, Lipoti Faaletausaga a le Pulega o Uafu ma Taulaga 2016/2017.

**TULAFONO TAU FAAOFI O TEUTEUGA O LE TULAFONO O LE
AO O LE MALO 2018 – faitauga muamua**

Susuga Hon TUILAEP AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI (Palemia): Lau Afioga i le Fofoga Fetalai ou te tulai atu ma le agaga faaaloalo e faatu le lafo, *Ina ia faitauina nei le Tulafono Tau Faaofi o Teuteuga o le Tulafono o le Ao o le Malo 2018 i lona faitauga muamua.*

Faaluaia e le Sui Palemia ma le Minisita mo Pisinisi, Alamaniua ma Leipa.

Na faamaonia le lafo ma faitauina le Tulafono Tau Faaofi o Teuteuga o le Tulafono o le Ao o le Malo 2018 i lona faitauga muamua.

**TULAFONO TAU FAAOFI E FUAFUA TATAU AI LE AVA MALOSI
2018 – faitauga muamua**

Afioga Hon TIALAVEA FEA LENIU TIONISIO HUNT (Minisita mo Tupe Maua): Lau Afioga i le Fofoga Fetalai, ou te faatu le lafo, *Ina ia faitauina nei le Tulafono Tau Faaofi e Fuaafua Tatau ai le Ava Malosi 2018 i lona faitauga muamua.*

05 OKETOPA 2018

Tulafono Tau Faaofi o Teuteuga o le Tulafono o Meatotino Tau le Atamai 2018 – faitauga muamua

Faaluaina e le Minisita mo Tina ma Tamaitai, Atinae o Nuu ma Afioga ma Agafesootai, Minisita o Tupe ma le Minisita mo Faatoaga ma Faigafaiva.

Na faamaonia le lafo ma faitauina le Tulafono Tau Faaofi e Fuafua Tatau ai le Ava Malosi 2018 i lona faitauga muamua.

TULAFONO TAU FAAOFI O TEUTEUGA O LE TULAFONO O MEATOTINO TAU LE ATAMAI 2018 – faitauga muamua

Afioga Hon LAUTAFI FIO SELAFI PURCELL (Minisita mo Pisinisi Alamanuia ma Leipa): Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Meatotino Tau le Atamai 2018 i lona faitauga muamua.*

Faaluaina e le Minisita mo Galuega, Felauaiga ma Atinae Eseese, Minisita mo Faatoaga ma Faigafaiva ma le Minisita mo Tupe Maua.

Na faamaonia le lafo ma faitauina le Tulafono Tau Faaofi o Teuteuga o le Tulafono o Meatotino Tau le Atamai 2018 i lona faitauga muamua.

TULAFONO TAU FAAOFI O TEUTEUGA O LE TULAFONO O MEATOTINO TAU LE ATAMAI 2018 – faitauga faalua

FOFOGA FETALAI: Talu ai ua ou taulimaina le Tusi Faamaonia o le Tulaga Faanatinati ua maea ona sainia e le Taitai o le Maota, o lea o le a sagai atu loa mo le faitauga faalua o le Tulafono Tau Faaofi.

Ou te tapa lau Afioga i le Minisita mo Pisinisi, Alamanuia ma Leipa.

Afioga Hon LAUTAFI FIO SELAFI PURCELL: Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Meatotino Tau le Atamai 2018 i lona faitauga faalua ma ou te fia tautala faamalamalama i ai.*

Faaluaina e le Minisita mo Galuega, Felauaiga ma Atinae Eseese, Minisita mo Faatoaga ma Faigafaiva ma le Minisita mo Tupe Maua.

FOFOGA FETALAI: Ou te tapa lau Afioga i le Minisita mo lau saunoaga faamalamalama.

**Tulafono Tau Faaofi o Teuteuga o le Tulafono o Meatotino Tau le
Atamai 2018 – faitauga faalua**

Afioga Hon LAUTAFI FIO SELAFI PURCELL: Faafetai atu i lau Afioga i le Fofoga Fetalai. A o le i faia se tala e muamua pea ona faatalofa atu ma faatulou i le paia o le Maota i le afio o lau Afioga i le Fofoga Fetalai tainane le afio o le Afioga i le Palemia ma le mamalu i Minisita o le Kapeneta. Minisita Lagolago tainane le mamalu o sui usufono uma o le Maota.

E faatalofa atu foi i le mamalu o sui o le atunuu aemaise o le fanau aoga aemaise foi o le tatou au taaalo o le a alo atu e tau le taua aua le tatou atunuu i taaloga i le lumanai.

E faatalofa atu foi i le mamalu i Pule Faatonu tainane Faauluuluga o Matagaluega a le tatou Malo.

E faatalofa atu foi i le tapuaiga a Samoa i lenei tacao mai lava i mauga tetele seia paia mauga iti.

Ua ou tulai atu lau Afioga e fia fai se tala e uiga i le Tulafono Tau Faaofi o Teuteuga o le Tulafono o Meatotino Tau le Atamai. Lau Afioga o lenei Teuteuga e teuteu ai le Tulafono Autu o Meatotino Tau le Atamai 2011.

O le Teuteuga lenei ina ia mafai ona tatou auai atu i faiga faafefaatauaiga o lea e i lalo o le faiga faavae o le Tulafono lea e taua o le Madrid Agreement sa sainia i le tausaga e 1891. O le faiga faavae fou la lenei sa faataatia mai i le 1989 e taua o le Madrid Protocol, ona o le nuu lenei o Madrid sa fai ai lenei feagaiga. O ona teuteuga la nei e lavea ai le faiga lenei e tau o le Madrid Protocol. O lenei faiga lau Afioga i le Fofoga Fetalai, e puipuia ai meatotino tau le atamai a tagata uma i lalo o le feagaiga lenei o le Madrid Protocol ma o lea ua i ai i lalo o le faiga lenei le puipuia ai a latou meatotino, tau le atamai. O meatotino nei e faaogaina e tagata faafefaatauaiga e i ai mea o maka foi nei, trademarks, o igoa, o mea uma lava e aafia i lalo o le faaupuga lenei o meatotino tau le atamai. O i la e puipuia ai i atunuu e ova i le 100 o lo o i ai i le taimi lenei o lo o latou faaogaina faiga faafefaatauaiga nei. O nei atunuu e lavea uma ai lava atunuu tetele o le lalolagi, aemaise a tatou paaga o lo o tatou faafetauai e pei o Niu Sila, Ausetalia, Amerika, o nuu o Europa, e faapena foi le atu Asia. O le tatou taumafai ina ia tatou faaogaina le faiga fou lenei ina ia ogatasi ai le resitalaina o tatou foi meatotino tau le atamai ma le faiga ua i ai nei le lalolagi lea ua resitala i le tatou Ofisa meatotino mai isi atunuu a isi tagata.

I le taimi nei o lo o vaitiiti lava le tatou puipuia o meatotino talu ai ona ua na o Samoa lava lea e mafai ona resitala ai meatotino tau le atamai. A oo atu loa i fafo, e leai la se puipuiga o tatou meatotino o lo o mafai ona faaogaina e isi tagata. A tatou o la i lalo o le faiga lenei o le Madrid Protocol, e resitala i nei se meatotino tau le atamai po o le intellectual property ae faamamaluina i atunuu uma lava lea o lo o i lalo o le faiga lea. E pei ona ou fai atu e ova i le 100 atunuu o lo o i ai i totonu. E resitala la i nei meatotino tau le atamai ae faamamaluina uma e nuu uma nei. A o le taimi nei, e faamamalu lava i Samoa ona gata ai lava lea i Samoa. O le faiga foi lenei e fesoasoani foi ma le malosi i le tatou aufaipisinisi ia ma e gaosi oloa aua o le a mafai lava ona resitala i nei a latou meatotino tau le atamai.

**Tulafono Tau Faaofi o Teuteuga o le Tulafono o Meatotino Tau le
Atamai 2018 – faitauga faalua**

O le taimi lenei, o lo o faimalaga atu nisi o tatou faipisinisi resitala i Niu Sila, ona o Niu Sila lea ua i lalo o le faiga lenei. O le taugata ia o lena foi faiga. Ae a tatou o loa i lalo o le faiga lenei, e tasi lava le totogi, resitala loa i inei le mea lea e manao e resitala, e puipuia ai le faaaoga e se isi tagata o le lalolagi atoa aemaise lava nuu nei e 100+ lea ou te fai atu ai e le tagofia e se isi intellectual property po o se meatotino tau le atamai a se tagata Samoa. E le taumate ua tele nisi tomāi tau le atamai o nai tagata Samoa ua faaaoga i fafo, faaaoga e isi tagata ona e le o lava se tatou puipuiga. O lea la o le a tatou ofi atu i i, e pei ona ou fai atu, o le a tele lava le puipuiga o a tatou oloa tau le atamai. E tele foi se tupe maua a le taou atunuu pe a tatou o lava i lalo o le faiga lea, aua o tagata uma lava mai nuu uma nei e 100 o le lalolagi o le a mafai ona resitala mai latou oloa tau le atamai i inei i Samoa. A resitala mai, ona totogi lea o latou tupe. O le taimi nei pe a ma le 700,000 mea nei o mark i fefaatauaiga, trading marks o lo o i totonu o le faiga lenei, ae na o le 7,300 ea mea ia ua resitala i lalo o Samoa. A tatou ofi atu la i i i totonu o le faiga lea, ona manatu lea po o le 600,000+ marks e mafai ona resitala mai i lalo o le faiga lea. A fuafua la i le tau lea e i ai pei lava e \$300 i le maka ona faatele lea i le 600,000 maka e tataua ona resitala mai, ia atonu o se tupe tele lava e latalata i le \$200miliona ea le tupe e maua e tatou pe a tatou auai i lalo o le faiga lenei. O le naunautauga lava lau Afioga ina ia faafaigofie fefaatauaiga a o tatou tagata ma fafo ina ia aua ne i faaaogaina e nisi tagata le afu o tatou tagata ma le tomāi lea sa mafaufau ai i ni faiga ia tumau lava na o Samoa e faia ai, sā ona faaaogaina e se isi tagata o le lalolagi.

Lau Afioga i le Fofoga Fetalai, atonu o se oototoga lena, na o le lua lava nai vaega o Tulafono Autu lea e toe faaopoopo i ai le Tulafono Tau Faaofi lenei ina ia manino ai le faagaioiga o le faiga lenei e tau o le Madrid Protocol ona e le o i ai i le taimi nei. E tele lava se suiga o le tatou Tulafono Autu o lo o faamoemoe e suia. O le faataitaiga lava i le mamalu o le Maota lenei, po o le vaiaso atu i ona tua sa ou i ai i Fiti. Ou te vaai atu la i le pepa a Fiti, o lo o vevesi Fiti ua faaaoga e le tagata le latou upu foi lea o le Bula i Amerika e faaia ai le pisinisi a lena tagata. Ia o la e la e vevesi Fiti ua le iloa po o le a le mea a fai ona e le o i ai i lalo i le faiga lea o le Madrid Protocol. Aua ana i ai i i, e puipuia uma lava mea ia, sa ona faaaoga e se isi le igoa o Samoa i fafo, sa ona faaaoga le Manu Samoa ma mea uma lava e tauave ai le igoa o le Manu Samoa. Ia o le mea la lena e tupu, o lena ua faaaoga e tagata Amerika le faatalofa foi lea a Fiti o le Bula e maua ai latou oloa a ua faafaigata ia Fiti ona taofi ona e le o i ai se puipuiga a latou. O le mea la lena e manumanu i ai, ma a tatou le ofi atu i le faiga lea, o Samoa foi le atunuu muamua lava i le Pasefika o le a galue i lalo o le faiga lea.

Lau Afioga i le Fofoga Fetalai, o se tau faamalamalamaina atu lena o le Tulafono Tau Faaofi, e faigofie lava ona o mea e puipui ai a tatou meatotino tau le atamai, ae maua mai ai foi ni tupe maua mo le tatou atunuu. Ma lou faaaloalo lava.

**Tulafono Tau Faaofi o Teuteuga o le Tulafono o Meatotino Tau le
Atamai 2018 – faitauga faalua**

FOFOGA FETALAI: Malo Faafetai. Ia o lo o tulai mai le Afioga i le Palemia. Ia ou te tapa ma le faaaloalo lau Afioga.

Susuga Hon TUILAEPA AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI: Lau Afioga na ona ou toe faapoopo atu i le taua o le Tulafono Tau Faaofi a le Afioga i le Minisita. Ae tomua atu au upu lau Afioga i sina au faamanuia a le Taitai o le Malo i le tatou au taaalo, toe o ni nai minute ona tataua lea ona tuua lea o le Maota nei ma agai atu loa e pue le latou vaalele e malaga atu ai i fafo.

O outou ia le au taaalo a Samoa, o outou ia tou te o ma tau outou o le avefua, e tou te faalelea le fua o le Malo lenei o Samoa. E le aoga ona faalelea ae tou omai e leai se mea tou te omai ma outou. Ia outou omai ma aumai ni tatou pine. E le aoga foi ni pine foi ia tamai pine, o pine ia e manao i ai o pine auro, aemaise o le tulaga lea e tapena i ai tatou i taaloga o le tausaga fou, o lea o le a fai mai i Samoa taaloga nei e le faigofie le talimalo. E tele mea na faavae ai le faaiuga a le Kapeneta, talimalo Samoa i taaloga o le Pasefika. E le gata ina faalauiloa ai Samoa ma ola ai pisinisi a o tatou tagata ae faalauiloa ai foi ma outou i taleni o lo o ia te outou. O le tou auai atu la i taaloga nei, o lea e tapena ai outou le au taaalo mo le tausaga fou. Talu ona fofoufou mai nei taaloga a le Pasefika, e le i oo lava Samoa i se tulaga muamua, vagana le tausaga 2007 na tatou ausia ai le tulaga lona lua, ae tatou te le i ausia lava se tulaga muamua. A o lea o le a fai mai taaloga nei i fanua. O lona uiga, ua faigofie atu ona auai le toatele, aua a fai i isi atunuu e filimafua le tatou autaaalo, e taugata i le tulaga tau tupe, a o lea la o le a fai mai i fanua, o lona uiga e le tataua ona i lalo ifo o le toaafie se tatou au taaalo. O e taaalo, ia maua pine e tau ai le atunuu lenei.

Ae faapitoa lau upu ia te outou faiaoga. O lea faatoa fai anapo le iuga lenei o le tou malaga. Aisea? Aisea le mea e ala ai ona faapea? Ua le tasi le lua le tolu a ua fai soo le tulaga lea o fanua a le atunuu o le a malaga ae faatoa aumai le tou pepa, e atagia mai ai le tou faatamala ma le le faataua o galuega ia tou te faia, ma ave na o tagata e tataua ona ave, ua uma le taimi sa faaoga ai upu nei e ave e faamatamata, e ave e faamasani. Ua ova i le 40 tausaga o tatou o i nei mea o taaloga, ae iu ane lava, o le upu lava lea. faamasani, ua ova masani ma le tafafaovale le mea e tulai mai ai. O le mea la lea, e agai tolu atu lava ia te outou o taitai o taaloga, fai lelei la outou galuega, ma outou faamaoni e le taugofie tupe nei tou te malaga ai, e taugata lo outou auai, aemaise o le mamao i Rusia le mea e fai ai le mau taaloga. O le a le mea e le o ai i mea lata mai? O le mea lea, ia fai la outou galuega, faamalamalama mai e le Kapeneta le tulaga ua tataua ai ona outou auai ae le o le faafenumiai ona atagia mai ai lea, e peiseai e mafua ona faatino la outou galuega o le tou fia o o outou nei e fai ma faiaoga. O le mea sili ona taua o le fanua a le atunuu ina ia maua le avanoa e auai ai ma tauva i taaloga nei ma omai ma se ai. O outou mama na, ia manuia a outou taaloga.

Tulafono Tau Faaofi o Teuteuga o le Tulafono o Meatotino Tau le Atamai 2018 – faitauga faalua

Lau Afioga i le Fofoga Fetalai, o le tulaga i le Tulafono Tau Faaofi lea ua tulai atu ai le Minisita, ua matua manino e taua aemaise o le lavelave ia e tatau ai ona resitala, e faamaonia ai o le meatotino o le meatotino a Samoa, a tagata o Samoa e maua ai se seleni e ola ai, e mafai ona faaaoga ae tatau ona aumai tupe e selesele ai i latou e ana tonu mea ia, o meatotino eseese e i ai le tulaga o vai, e i ai le tulaga o mataupu tau pesega, o mea faapena, fatu sau pese, e tatau ona resitala ia aua ai ne i toe kopi e se isi fatuga, e le gata o upu ae faapea foi ma le fati malie. O itu taua ia, ma ua mu o tatou lima i tulaga ia. O lea ou te manatua o le faataitaiga aupito sili lava ona maoae sa tupu i le 48 tausaga talu ai, sa i ai le tatou saienisi e igoa o Petrana, o ia lena na amata ona teuapa le peepee e aunoa ma le mafu. Ua taumafai i ai le toatele o atunuu e le mafai, e mafu lava le peepee. O lea la na faaaoga ai e le saienitisi lea se auala e felesi ai pea le peepee, lea la sa matua alu ai i le atoa le tatou fale peepee, alu i le atoa i le taulia o fale peepee i fafo.

Na pau lava lea o le mea na vasi, sa tatau ona resitala le tatou peepee o le meatotino a Samoa semeamanu e tele lava a tatou tupe e maua ai. Ua te i lava le fale peepee ua fausasaga mai le fale peepee ua tusi ai le upu peepee, peepee a Thailand, peepee a Filipaina, ua faaaoga le upu peepee, upu Samoa. O le taua ia o le mea lena e toe apaapa atu tatou ua le aoga. O le faatamala i na ona po. E le gata i le faatamala ae oo foi i le tatou laau foi lea sa tatou femitai ai o le a maua ai le fofo o le Aids, ona ave foi lea i fafo, ae tapa atu foi ua muamua foi resitala i isi atunuu le laau lava lea e tasi. O le mea maoae lau Afioga i le Fofoga Fetalai, a tatou o nei i fafo i le itu i Saute o Saina i le mea foi lea e mafanafana pe tatou te o i Brazil i mea mafanafana, tatou te maua uma ai lava mea ia e maua i inei ma laau ia e maua i inei, e maua ai fai misiluki, maua ai mago, mea uma lava ia e maua i inei. E oo lava i Aitiopie, e maua uma ai lava mea ia e maua i inei i atunuu mafanafana. E tatou te femitai atu la o lea e maua laau i inei, a o la e maua foi laau i la atunuu.

O le tulaga lena o le Tulafono Tau Faaofi lea, ae faamalo foi i le Minisita i le mataala, ona e i ai feagaiga nei faava o Malo, e i ai taimi e misi ai ia tatou ae o lea ua pue mai e le Minisita ia aua ne i toe tupuni mea faapea i totonu o le tatou atunuu.

Ia manuia le Fono ma ia tatou agai loa o lea ua uma ona faamatala i le aso ananafi sa outou i ai uma. O le toe faaopopo atu lena lau Afioga.

FOFOGA FETALAI: Malo faafetai. Ua manino au o fala e tusa ai ma le Tulafono Tau Faaofi, ma e pei e foliga mai o lenei Tulafono Tau Faaofi ua leva na tatau ona aumai a o lea faatoa aumai aua se manuia o le atunuu. O le mea la lea, ia ua ou iloa foi ua manino i le faafofoga a le Palemene.

Se i tulai mai lava le Taitaifono o le Komiti o Tupe, lau Afioga i le sui usufono mo Alataua Sisifo.

**Tulafono Tau Faaofi o Teuteuga o le Tulafono o Meatotino Tau le
Atamai 2018 – faitauga faalua**

Afioga ALIIMALEMANU ALOFA TUUAU (Alataua Sisifo): E faatalofa atu i lau Afioga i le Fofoga Fetalai faapea le mamalu o le Palemene. Ia o le ala o le tulai, se i fai sina tala puupuu lava e lagolagoina ai le Tulafono Tau Faaofi ona o le taua o le tatau ona amanaia o le maliega lea o le Mandrid Agreement i totonu o Samoa lea ua uma ona faamatalaina.

O le ala la o le fia fai foi o se manatu, o le taua lea o le ogatasi ma faiga faaonaponei i le resitalaina o upu ma igoa ma isi lava faailoga o lo o faaogaina i fefaatauaiga. O le taua lea i le matou itu o le Tulafono Tau Faaofi ua tuuina mai.

O le mea taua i le faafofoga atu i le aso ananafi, o lo o faalelei uma nei suiga ma faatupeina mai e le Faalapotopotoga mo Meatotino tau le Atamai a le lalolagi. E pau lava le tau i le Malo o Samoa o le totogiina lea o le aufaigaluega o le a latou faatinoina le resitalaina. E taua tele ona o a tatou upu pei ona saunoa le Afioga i le Palemia pei ona i ai le tatou upu lea o le talofa, faapea le upu o le Manu Samoa ma nisi tulaga ua tatou lausilafia.

O le faatinoina la o lenei faamoemoe e faatauava lava lea ona e fesootai ma le tulaga lea i le climate change. E pei o le ala lena o le toe faaopoopo atu ona o le vaega o le galuega mo le resitalaina o meatotino tau le atamai lea o lo o taua o le paper less IP Registry. Ia o le faatinoina ma le faatupeina e talitonu o lo o faatinoina e le faalapotopotoga o meatotino a le lalolagi. O le taua foi lena o le lagolagoina o le Tulafono Tau Faaofi ina ia faaoga pea le tulaga lea o le paper less ina ia tatou aufaatasia uma i le mea o lo o tatou taumafai atu i ai i le tetee atu i le suiga o le tau.

Ma le faaaloalo lau Afioga i le Fofoga Fetalai. O se manatu puupuu lena e lagolagoina ai le Tulafono Tau Faaofi. Faafetai mo le avanoa.

FOFOGA FETALAI: Malo faafetai saunoa. E matauina o lo o tulai mai le sui usufono mo le Itumalo Tu Taulaga i Sisifo.

Tulai mai lau Afioga i le sui usufono mamalu.

Afioga FAUMUINA ASI PAULI WAYNE FONG (Itumalo Tu Taulaga i Sisifo): E momoli atu le faafetai i lenei taeao i lau Afioga i le Fofoga Fetalai, afio foi le Afioga i le Palemia aemaise foi lena itu i Afioga i Minisita ma Minisita Lagolago ae faapena foi lenei itu. Ua ou tulai atu e faaali nai tamai manatu lava ia lau Afioga i le Fofoga Fetalai.

O le mea muamua ou te faafetai tele i lau Afioga ona ua talia le talosaga na avatu ananafi ia aumai faatopetope lava le Tulafono Tau Faaofi lenei ona o le taua ma le tatau ona fai. Ia o lea ua faataunuuna i lenei taeao ma talosia ia vave ona tatou pasia le Tulafono Tau Faaofi.

O nai fautuaga laiti ia lau Afioga i le Fofoga Fetalai i le tulaga e ao ona puipuia ai foi lenei Tulafono iinei i Samoa aua e foliga mai seiloga e alu atu le tagata e resitala lana mark po o lana trademarks ona faatoa mafai foi lea ona talia e le Ofisa.

05 OKETOPA 2018

Tulafono Tau Faaofi o Teuteuga o le Tulafono o Meatotino Tau le Atamai 2018 – faitauga faalua

Ae na o se fautuaga, e i ai foi se agaga foi i le Ofisa ina ia puipui foi latou i tulaga faapea e pei la o le mea lea na tulai mai i Fiti. Aua e le mafai ai seiloga e alu atu se isi e resitala le tulaga lea faatoa mafai lea ona resitala. A o le agaga lava ia o lenei sui usufono, pe mafai ona amatamea le Ofisa o le MCIL ina ia puipui latou i upu nei i Samoa ma tulaga faapena ma mea e silafia e taua mo le tatou atunuu.

Ia e ala atu foi se fautuaga foi i le Minisita mo Fesootaiga, o lea e alaala mai le Afioga ia Afamasaga, e pei e tataua ona tilotilo foi tatou i se tatou maka lea po o se foliga api po o le Facebook Pacific po o le Facebook Samoa. Ia tatou agai i ina, fai pe fia se tupe, ave i ai se tatou tupe e resitala ai se tatou tulaga faapena ina ia mafai ai ona tatou talia lea tulaga aemaise foi o tatou pese Samoa aua seiloga e resitala atu ona faatoa mafai lea ona tulai mai se tulaga faapena.

E i ai foi se manatu e tataua foi ona resitala le tatou HRPP ua leva ona tatou... E matautia le matatia ua ausia, resitala ne i te i ua uma atu tatou ae toe sau se isi faaoga, a o tatou lea sa amatamea lau Afioga i le Fofoga Fetalai. Ia o nai manatu ia, a ia manuia lava le Fono i lenei taeao. Faafetai.

FOFOGA FETALAI: Malo. Ia, atonu ua maea finagalo a o lea o le a tuu atu i le Minisita ma le Malo. Ia se i tuu atu la leaga o lea ua tulai mai le sui usufono mo Salega Sasae.

Tofa OLO FITI AFOA VAAI (Salega Sasae): E piiama foi lenei itumalo lau Afioga i le Fofoga Fetalai i le taulaga faafetai sa e siitia i le taeao ua sola, e faafetai ai Lona agalelei i le taitai mai foi o le soifua o lau Afioga i le Fofoga Fetalai faapea foi le Afioga i le Palemia, o le Aiga Kapeneta ma Sui Minisita ma le mamalu o le Palemene nei, e faapea foi Faauluuluga o Matagaluega, ma fanau foi e pei ona tatou faatasi i lenei taeao.

Lau Afioga i le Fofoga Fetalai, maimau e pe ana faapea e tuu mai se avanoa foi lea se i tau sailiili ai i le taua o le Tulafono Tau Faaofi. O se Tulafono Tau Faaofi matagofie lenei Tulafono i lau tilotilo ma o se Tulafono e aoga i le lumanai o le tatou atunuu.

Na pau lava le vaega lau Afioga, ona e pei e tau ogatasi lava le agreement lea le Madrid ma fuafuaga ma le tulaga o le tatou auai i le WTO. I lau la tilotilo e pei e foliga ua leva ona i ai ni feagaiga nei ae le i aumaia le faamalosiga e pei ona aumai ai nei le tatou Tulafono Tau Faaofi. O lau la fua i ai, e taua atu ia te au le faatino, aua pei e maua mai e lau Afioga lau faamatalaga o lea ua leva ona i ai tatou Tulafono a tatou lava lotoifale e tau aiga ma le Tulafono Tau Faaofi lenei ma le faaogaina, aua e i ai le WTO pei ona tatou auai i totonu. O lea ua aumai ma le Tulafono Tau Faaofi lenei e foliga mai na o le lau mai o Tulafono Tau Faaofi ae tatou te le o faaogaina tataua le tulaga lea. Ia, e pei lava o le faataitaiga i inei lava ia, o isi a tatou vaega ia i le flea market, e aumai lava le latou faasea foi lele i le tulaga o le gaosiaina o oloa a tatou lea ua aumai ua print mai fafo mitiafu o tusi i Samoa i pisinisi ia mai fafo lea ua fai i totonu ia tatou.

**Tulafono Tau Faaofi o Teuteuga o le Tulafono o Meatotino Tau le
Atamai 2018 – faitauga faalua**

O le isi foi vaega a ta alu foi ta te matamata i totonu o flea market i Niu Sila, ua leiloga se pisinisi latou te faia le elei a Samoa, ae i ai lava le manatu ia te au o lea ua leva ona i totonu o le WTO, a o le faagaoioiga ma le faatinoga o le galuega, e tulitulimatagau ai tulaga ia, e pei o le lape lena o lea ou te iloa e au o lea e feagai ma le tatou Matagaluega.

Ia, na o nai fautuaga lava se i toe silasila totoa i ai, a o lenei Tulafono Tau Faaofi e pei ona tulai atu ma le agaga faaloalo lau Afioga i le Fofoga Fetalai, e faatauaina ma iocina e lenei itumalo. Ma le agaga faaloalo, faafetai.

FOFOGA FETALAI: Malo faafetai. Se i tulai mai le sui usufono mamalu o lea itu o le Maota lau Afioga i le sui usufono mo Palauli le Falefa.

Afioga Hon FAUMUINA TIATIA FAAOLATANE LIUGA (Palauli le Falefa): Faafetai i lau Afioga i le Fofoga Fetalai mo le avanoa. Ou te tulai ou te lagolagoina le Tulafono Tau Faaofi e pei ona tuuina mai. O lea sa saunoa le Afioga i le Minisita o le 1991 le tausaga sa fai ai lenei feagaiga, ma o le atunuu foi lea e fai ai o se atunuu o tagata e saili mea fou, ma o tagata e folau e pei lava o tatou. Ae ou te iloa o le taua ia o lenei Tulafono Tau Faaofi i le puipuiga o a tatou meatotino tau le atamai. O le taulaga lea e fai ai le feagaiga lea, o Madrid, o se taulaga e fialia tagata, o tagata talenia. O lea e faapea ai, get rid of the madness. O lona uiga, Madrid, o le agaga fialia pei ua faavalea i le tulaga o le faafiafiaga. Ma na pau lava lau... Ou te iloa le teuteuga o le Tulafono Tau Faaofi lea ua saunoa i ai le Afioga i le Minisita, ia align ai le tatou Tulafono a le tatou lava atunuu ma le feagaiga faava o Malo e pei ona i ai. Ae faafetai i lau Afioga mo le faatofalaiga, ona ua amata nei ona tatou laa atu i se tasi o laasaga taua e puipuia ai, aua o lea foi sa faasalalau tatou ulu. Aua pei ona malie i le saunoaga a le Afioga i le Palemia, o tatou ulu foi ua salalau, ae ou te le iloa po o puipui tatou e pei o le... o lea foi sa faasalalau i le isi vaitaimi, o le maafala, o le ulu Samoa. Ua tatau foi ona silasila le tatou Malo ma tatou le Palemene ina ia puipuia mea uma lava e maua ai ni a tatou faamanuiaga ma puipuia ai le aiatatau a o tatou tagata i a latou meatotino.

Ou te faafetai atu ai i lau Afioga mo le avanoa, e faafetai atu foi i le Minisita mo le tuuina mai o lenei Tulafono Tau Faaofi. Faafetai.

FOFOGA FETALAI: Malo faafetai. Ma ou te tapa lau Afioga i le Minisita mo nisi o mea sa laga, po o lea lava ua manino au o fala i le Maota, e lagolagoina foi e le Maota ona tulaga o le Tulafono Tau Faaofi ua leva ona tatau ona aumai e faatino ai le atinae o le atunuu ina ia mafai ona aua ne i toe oia taumafaiga a le atunuu o lo o i ai lo latou tomai i tulaga ia, ina ia aua ne i oia i atunuu i fafo. Pe i ai se isi mea e te fia saunoa i ai se i tuu atu le fesili?

Afioga Hon LAUTAFI FIO SELAFI PURCELL: Lau Afioga na o le momoli atu o le faafetai i manatu sa faaalua. O manatu uma lava e lagolago ai le Tulafono Tau Faaofi, ae moni foi le sui usufono o lo o i ai lava vaega o le WTO, ae pei o le vaega lea, e maoti lava i mea ia o marks e tapue uma ai.

05 OKETOPA 2018

**Tulafono Tau Faaofi o Teuteuga o le Tulafono o Meatotino Tau le
Atamai 2018 – iloiloga auiliili**

A sau le Tulafono a le WTO alu ae ma le Tulafono lea, o mea lelei uma lava mo le tatou atunuu, ae faafetai tele lava mo le lagolago ua faaalua i lenei taeao. Faafetai.

FOFOGA FETALAI: Malo faafetai.

Na faamaonia le lafo ma faitauina le Tulafono Tau Faaofi o Teuteuga o le Tulafono o Meatotino Tau le Atamai 2018 i lona faitauga faalua.

**TULAFONO TAU FAAOFI O TEUTEUGA O LE TULAFONO O
MEATOTINO TAU LE ATAMAI 2018 – iloiloga auiliili**

FOFOGA FETALAI: E tusa ai ma Tulafono Tumau, e amata le iloiloga auiliili o le Tulafono Tau Faaofi i le Fuaiupu 2.

FUAIUPU 2: Ua teuteuina le fuaiupu 2.

Faamaonia.

FUAIUPU 3: Ua teuteuina le fuaiupu 55.

Faamaonia.

FUAIUPU 4: Ua teuteuina le fuaiupu 137.

Faamaonia.

FUAIUPU 1 MA LE IGOA

FUAIUPU 1: Igoa puupuu ma le amataga.

IGOA: Teuteuga o le Tulafono o Meatotino Tau le Atamai 2018.

Faamaonia.

Na faagasolo le Tulafono Tau Faaofi o Teuteuga o le Tulafono o Meatotino Tau le Atamai 2018 e aunoa ma se Teuteuga.

05 OKETOPA 2018

TULAFONO TAU FAAOFI O TEUTEUGA O LE TULAFONO O MEATOTINO TAU LE ATAMAI 2018 – faitauga faatolu

FOFOGA FETALAI: Ou te tapa ma le faaaloalo lau Afioga i le Minisita mo Pisinisi, Alamanuia ma Leipa.

Afioga Hon LAUTAFI FIO SELAFI PURCELL: Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Meatotino Tau le Atamai 2018 i lona faitauga faatolu.*

Faaluaina e le Minisita mo Galuega, Felauaiga ma Atinae Eseeese, Minisita mo Tina ma Tamaitai, Atinae o Nuu ma Afioga ma Agafesootai ma le Minisita mo Faatoaga ma Faigafaiva.

Na faamaonia le lafo ma faitauina le Tulafono Tau Faaofi i lona faitauga faatolu ma faapea ona pasia le Fono Aoaio Faitulafono.

LAFO MO LE FAATAATIA ESE O TULAFONO TUMAU

FOFOGA FETALAI: Ou te tapa lau Afioga i le Palemia.

Susuga Hon TUILAIPA AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI: Lau Afioga i le Fofoga Fetalai ou te tulai atu e faatu le lafo, *Ina ia faataatia ese Tulafono Tumau 101 ma avanoa ai le faitauga faalua o Tulafono Tau Faaofi na faaofi i le taeao lenei.*

Faaluaina e le Minisita mo Pisinisi, Alamanuia ma Leipa.

Na faamaonia le lafo.

TULAFONO TAU FAAOFI O TEUTEUGA O LE TULAFONO O LE AO O LE MALO 2018 – faitauga faalua

FOFOGA FETALAI: Ou te tapa ma le faaaloalo lau Afioga i le Palemia.

Susuga Hon TUILAIPA AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI: Lau Afioga i le Fofoga Fetalai ou te faatu le lafo. *Ina ia faitauina nei le Tulafono Tau Faaofi o Teuteuga o le Tulafono o le Ao o le Malo 2018 i lona faitauga faalua ma ou te fia tautala faamalamalama i ai.*

Faaluaina e le Minisita mo Pisinisi, Alamanuia ma Leipa ma le Sui Palemia.

05 OKETOPA 2018

**Tulafono Tau Faaofi o Teuteuga o le Tulafono o Le Ao o le Malo 2018
– faitauga faalua**

FOFOGA FETALAI: Ma lou faaaloalo o le avanoa lenei mo lau saunoaga faamalamalama lau Afioga i le Palemia.

Susuga Hon TUILAEP AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI: Lau Afioga i le Fofoga Fetalai, o lo o faamauina a uma le faitauga faalua ona see atu foi lea i le Komiti latou te iloiloina, Komiti a le Palemene ma toe foi mai ai le Tulafono Tau Faaofi lenei mo se tatou toe iloiloina i le Fonotaga o lumanai. Ae i le matau, o le aso ananafi lea sa fonu ai le tatou Palemene nei i alii ma tamaitai sui usufono e tuuina atu ai le faamalamalama o le Tulafono Tau Faaofi lenei e le Faauluuluga o le Matagaluega o lo o nafa ma le vaia o le Tulafono Tau Faaofi ma lona faatinoga. E pei ona silafia lau Afioga, o le faiga lea o se faiga fou, e le o se faiga ua leva. Ou te matau i le tauaofiaga talu ai na amata ai le faiga lea, ma ou te faamalo foi i le Matagaluega o le Fono Aoaofaitulafono i le magafagafa i le usuia o le fonu lea faapitoa e valaau uma atu ai sui usufono o le Maota e faatalatalanoa ma faamalamalama vaega uma o le Tulafono ona e seasea ona maua avanoa e mafai ai e i latou ona faamatala aua e moni lava o matou ia e tutulai atu i i e ana Tulafono, a o le auiliiliga ma le tele o le gaosa, e pei o mataupu ia sa nafa ma le au Tusi Tulafono. O matou ia na ona faamatala atu o faiga faavae, ia ona faaupu lea e latou.

Lau Afioga i le Fofoga Fetalai, o le agaga fiafia lenei. Ou te matau atu e pei lava ona ou tau atu faatoa amata i le Paeaiga talu ai le faiga lea ina ia tatou ioeina ae le Tulafono a ua malamalama itu uma. A o le matou tutulai atu la, na ona fonofaapipi ma toe faamalamalama nisi foi o mataupu e ono toe laga mai. I le taimi na faatoa ou tulai mai ai au i totonu o le Maota, o le faiga lava lea sa i ai, e leai foi ni taimi e mafai ai ona matou faitauina Tulafono, na ona faataoto mai lava amata loa ma le Fono talanoa loa i Tulafono. O le mea la sa masani ona matou faia, o matou nei o sui usufono a lenei Vaega Faaupufai, e pei e aumai loa lava tu loa le matou Taitai saunoa faalauaitetele, o ia la pei o le tagata ua leva i totonu o le Maota i le agaga o le Tulafono. E uma ane ona ia lauga i le fia minute, a ua amata ona faasolosolo atu le matou faitau i le Tulafono ona faasolosolo atu ai lava lea i le 2, 3, 4. E oo ane i le lona fa, ua matou faitau umaga le Tulafono. O mea ia sa matou le maua i na ona aso. A o nei la ona aso, ua matua siamu mea uma, ua faigofie i le malamalama. Ae se i vagana la le sui usufono e soifua mai lava ia e le fia malamalama ona umi ai lava lea o le tatou fesufiaiga o mataupu.

Lau Afioga i le Fofoga Fetalai, ua 56 tausaga talu ona tutoatasi le Malo o Samoa. Ina ua faataoto mai e le Fono Faavae aiaiga o le Tulafono ma tulai mai ai le Ao Soofaatasi. O se mea matautia lea mea, e le tasi se Ao ae lua Ao o le Malo. I le tofamamao sa i ai i le 160 tupu ma ee o le atunuu na latou soalaupuleina le Faavae, ona faia ai lea o le latou faaiuga, o le a lua Ao o le Malo.

**Tulafono Tau Faaofi o Teuteuga o le Tulafono o Le Ao o le Malo 2018
– faitauga faalua**

O faalupega o le Ao Soofaatasi o le Afioga ia Tupua Tamasese Meaole, ma le Susuga ia Malietoa Tanumafili II ma aiaiga e faapitoa lava mo laua e toalua. A uma ua maliu le isi ua tuumalo, ona faaauau lea e le isi seia oo lava ina afu lana tautua ua valaau e le Atua. Ona o lea la ua faagafua nei le tofiga o le Ao o Le Malo, ona aumai loa lea o aiaiga o le Faavae, o le a filifili loa le Palemene lenei i se sui e fulisia i ai le Palemene e nofoia le nofoa i le tailima tausaga. O lona uiga o aiaiga sa i ai, e faapitoa lava i le toalua lea o Malietoa ma Tupua Tamasese. O le ala lena lea na manatu ai le Malo, ua oo i le taimi e tatau ai ona toe soalaupule le Faavae, ua le o toe aoga ia aiaiga faapitoa i ai laua ia e toalua, o lea ua sui, o le a filifili e le Palemene lenei le sui e avea ma Ao o le Malo. E leai foi ni aiaiga o i ai i le Faavae e faapea mai, e na o ē papae, po o ē eena e avea ma Ao o Le Malo, e leai se aiaiga faapena. O la e taoto mai lava i le lautele o e fulisia i ai le finagalo o le Palemene lenei a ia matai, tusa lava la pe enaena, samasama, paepae, pe lanumoana ae ia matai, o le matai Samoa. Na pau lava lena o le aiaiga lea e i ai, e filifili e avea ma Ao o Le Malo. E le o faapea mai foi e na o tama tane. E leai foi se tulaga faapena e ui a tilotilo la...o le faavae lea ou te talanoa atu ai. Ae a tilotilo la i le Tulafono lea e faatino ai aiaiga o le Faavae, o le Tulafono o le Ao o Le Malo, e i ai faaupuga la e i ai, e pei e le manaia e pei e na o alii.

O lea la ua teuteu le vaega lena o le Tulafono, ina ia o gatasi ma le mea lea ua i ai le atunuu ma le mea lea ua i ai le lalolagi atoa, ae aua ne i i ai se tulaga e faailogalanu. O le a le uiga o lea mea? A tulai mai lava o le tamaitai ua filifili e le Maota lenei, ia o lena, o le tamaitai. Ae afai foi e fai sona toalua, o lea la ua aumai e le Tulafono, ia lea foi ua manino. E pau lava la le faaupuga lea e i ai pei o lea e sasi ai le mataupu lea i le faa-Samoa, sa le tatau ona tuua i lalo le faletua ae tuu i lalo le toalua, upu faigofie. O le mea lea e leaga ai mea nei mo mea o faalilitu upu, e o fua aumai upu e nunu ai le toau, ae le aumai upu faigofie, ia lea la ua oti atoa ai le vaega lea o le Tulafono. E avatu i o i le Komiti ona aveese lea o le upu lea faletua, aua a faletua o lona uiga o lea e i ai i totonu i i, e alii lava le Ao o Le Malo.

O lea la e sao le faa-Peretania, ae matua sese i o i Rusia le faa-Samoa o le upu lea o le faletua, ae tatau ona tuu i lalo o le toalua. O lona uiga a tulai mai le tamaitai, ia o lana masiofo la, o lona toalua o le tamaloa. E nofo la ia i o e tata la tagamea ma lomilomi vae o le loomatua pe a alu atu ua tiga i le tele o galuega sa feagai ma le aso.

Lau Afioga i le Fofoga Fetalai, o le tulaga la lena o le teuteuga ua le toe talafeagai aiaiga ia sa i ai, ona sa faapitoa lava aiaiga nei, i le toalua lea o Malietoa ma Tupua Tamasese lea la ua sui atoa le tulaga lea ua i ai, ua uma ona teuteu isi vaega o le Faavae tai pei o le filifiliga.

Ae tele lava upu foi le mafaufau na ave i le filifiliga e pei ona silafia o le filifiliga sa i ai i le Faavae na taoto mai i le 1962, e faapea le filifiliga na faia e le toatasi, faalua e le isi ona faatu se igoa o se isi e avea ma Ao o Le Malo.

05 OKETOPA 2018

**Tulafono Tau Faaofi o Teuteuga o le Tulafono o Le Ao o le Malo 2018
– faitauga faalua**

Ia ua manatu atu nei le Malo, le HRPP - le Malo o le HRPP, a tatou alu i le mea lena, e 50 le aofai o sui usufono lea e i ai nei o le Maota. O lona uiga e ono oo i le 50 sui usufono e faatu i le mea foi lea ua masani ai tatou, o taga ia faa-tulafale, faatu lau tama, ae o le a ou faalua, a uma, faatu foi lau tama, ae e faalua. Alu alu loa lea uma ifo ua 50 le aofai o sui faatutu, e le lelei lena mea i le filifiliga o se Ao o Le Malo. Ia filifili mamalu aemaise o lea ua tulai mai ia faiga vaega.

Sa leai ni vaega i na taimi, a tasi loa le vaega a le tagata ua agai i ai, e na o le tasi. E le toe pule Simi ma Sione i totonu o le vaega e alu lava e ave lana sui e tusa ai ma aiaiga o le Faavae o le 1962. O lea foi la ua uma ona teuteu lena vaega. O lea ua uma ona tapena uma e le HRPP ia tulaga uma ina ia smooth, ia mafana, ia sologalelei ia tofiga i le Ao Mamalu o Le Malo. Lea la ua agai mai i le vaega o lo o totoe, ina ia teuteu nai vaega ia, lea o le Tulafono lea ua leva ona tatau ona teuteu, ae o lea sa fai muamua mea sa tatau ona fai muamua. O lea la e faamatala atu sini ma mafuaaga lea ua i ai i totonu o faamanuiaga, totogi ma alauni o Le Ao o Le Malo. Ia ae le mafai foi ona fai na o le Ao o le Malo, ae le amanaia Sui Tofia. Ia e tatau lava ona ave foi le faamanuiaga mo Sui Tofia e pei ona silafia. Lau Afioga i le Fofoga Fetalai, o le agaga lava ia mai le amataga, o Sui Tofia, e faatoa faamamalu lava Sui Tofia pe a leai i Samoa nei le Ao Mamalu o Le Malo. O lona uiga o taimi uma lava e i ai Le Ao Mamalu, e matua leai lava ma se Sui Tofia e amanaia. Ia ae o lea la ua sau sau lava, ua sui foi aga o le aso, ua tatou faatauaaina foi ma Sui Tofia. O lona uiga, o mea sa masani na o le Ao o Le Malo e i ai, a i ai le Ao o Le Malo, e le tatau ona toe i ai se Sui Tofia.

Ae o le a le mea lea ua i ai nei? Pe i ai lava le Ao o Le Malo e i ai foi ma le Sui Tofia, ua ese aso, ua tatou ave le faataua iai latou foi ua faalupe o Sui Tofia, o lea la ua i ai totogi ua faamauina ma agavaa i faamanuiaga. O le Tulafono ua faafoeina e le Matagaluega o le Palemia ma le Kapeneta le Tulafono lenei. O le a le itu taua o mea ia? E mai lava i le amataga, sei tau mai lava nei talaatu ananafi, sa eseese le faatulagaga o totogi. A oo ina faatulaga le totogi o le Ao o Le Malo ua fai le Komisi Suesue, aua foi e ese. Sa ese le Pule e faatulagaina totogi o le Palemene, ese le Pule e faatulagaina totogi o le PSC, tagata faigaluega a le Malo, ese le Pule e faatulagaina totogi o Faamasino, ese foi le Pule e faatulagaina totogi o i latou ia o Matagaluega ua tumaoti.

Ia ona tulai mai loa lea i le tausaga e 2000, i lou tulai mai ma le Malo i lena taimi, ona faia ai lea o le iuga, e le matagofie lea mea. O le mea lea e tutupu ai mea o solotetee, aua o le mea na sau ai, e eseese Pule sa latou faatulagaina. O le ala lena o lea na fai ai loa le iuga a le Malo ma faatulafono ai loa, e tatau ona faatu se Tribunal, Fono Faapitoa, e fai ma a latou galuega le faatulagaina o totogi. O le latou galuega e aofia ai le itu o le vaai uma lava i itu eseese sa tatau ona eseese fua o latou totogi.

**Tulafono Tau Faaofi o Teuteuga o le Tulafono o Le Ao o le Malo 2018
– faitauga faalua**

O le mea la lea na tupu, e i luga totogi o le aufaigaluega a le Malo, ae i lalo lava totogi o le Maota leni. O lea e alaala mai nisi, e tau aumai loa e le HRPP se teuteuga e pei o le a le alaga a le Itu Agai i lena taimi, talofa i le atunuu, talofa e i le atunuu o lea o le a sii o tatou totogi. Ia ona fai ai lava lea o le faiga faavalevalea lea e taomi ai i lalo totogi o sui usufono o le Maota leni ae alu lava i luga totogi o le aufaigaluega a le Malo, aua foi, e fai poloka totogi o le aufaigaluega a le Malo, e i ai mea o sitepu i totonu. E i ai le maualalo e i ai le maualuga ae o le va la o le maualalo ma le maualuga, e i ai sitepu e 3 i le 4 sitepu. A lelei lau galuega, ua e sii mai i le sitepu sa i lalo i le sitepu feooloo. Ia, mo tagata lelei ia, ae i ai foi ma isi tagata leaga e te i lava ua sao atu ai i mo mea o iuga foi ia e faale-atoatoa, ia ae ua tei lava ua sii atu ai ma le isi tagata e le tatau ona sii.

O faiga la ia e le mautu lea na sau ai lo tatou Malo mai lava i le Tutoatasi se i tau talaatu ananafi i le tausaga 2000 lea la na teuteu atoa e le HRPP le mea lea, ina ia sologa lelei le mea lea, ma aua ne i toe i ai ni tagata e soona savavali i le aualatele ma faaali lo latou le fiafia ona o le tulaga o le le vaai o le Malo i le tulaga e tatau ona i ai tau. O lea la ua vasaga lelei, ua faataoto le mea o le auivi, e maua uma ai lava tagata i totonu o le auivi lea, e aofia ai ma le Ao o Le Malo. O lona uiga, e tasi lava le authority, e tasi lava le pule latou te faatulagaina totogi o le aufaigaluega uma a le Malo. O le mea e aupito sili ona taua, aua ne i vaai pito tasi, ia vaai foi i tua, le aufaigaluega i tua, o latou o faipisinisi.

Ina ua siitia totogi i le 2005, i le 42%, vaai i le maualalo tele o le mea na i ai totogi o le atunuu, sii mai lava i le 42% oki atoa ai ma le Private Sector, o le tele ia o le latou faitio, ae sa fai le fuafuaga e 3 tausaga o fai auauai, aua e lelava tupe a le Malo i le taimi lena. O lea la na fai auauai ai ma faamanuiaina uma ai vaega uma. Ae o le a le mea lea e tupu? E tiga ona faataoto le auivi lea, ae i ai lava Komiti o le Malo, e nonofo lava ma taumafai e talepe le mea lea. O le mea lea e matua faaeteete tele i ai le Malo. Aua lava ne i oso ese le faatulagaga o totogi ma le auivi lea ua faataoto, aisea? Leaga o i tonu lava e tutupu ai faalavelave, e tutupu ai faalavelave, aua ne i vaai mai se vaega o le aufaigaluega e pei ua tatoso isi, ae faasavavali isi, ae afisi isi.

O lea la ua faavasaga lelei ai i i, ma o lea la ua logo mai le Kapeneta e latou ia i le latou tilotilo i le agai i luga o le tau o le soifuaga, ua tatau foi ona toe i ai se isi teuteuga. Ia lea la ua uma ona fai i ai le iuga a le Kapeneta, o le mea e tou te silafia e tatau ona fai, fai aua le tuua. O le mea lena na ala ai ona faatu le tou Komiti, a le faia loa le tou tiute, ia pau lava le mea, ia o le fafo o outou ma le maafala. Ae fuafua ia tau o le aufaigaluega uma a le Malo, e aofia ai ma le Ao Mamalu o Le Malo.

O le tulaga la lena ua outou silasila i ai leaga na ou faalogo, sa silisili isi, ae o le tulaga lena, ma o le history atoa lea, ma o le fofa lea e le i faapea na faatoa fuafua i le tausaga e 2000. O le fofa lea, o le fofa na fanau mai i le tulaga o mea ia na tutupu i le 1981 i le tevatele o le tatou Malo lea na tupu, ma o le faatamala i lena taimi na mafua ai ona tupu le mea lea. Sa tatau lava ona vave fofa i lena taimi semeamanu e leai se teva tele a le Malo.

05 OKETOPA 2018

Tulafono Tau Faaofi o Teuteuga o le Tulafono o Le Ao o le Malo 2018
 – faitauga faalua

Lau Afioga i le Fofoga Fetalai, e i ai le vaega lea o lo o taua i le Tulafono mo mea o tofiga, tofiga ia o le aufaigaluega a le tatou Ao o le Malo. Ua uma aso la o le tulaga foi lele o le tau leai o ni galuega. O aso nei, ua matua tele lava a tatou galuega ia e fai. Ia manatua foi, o le galuega tumau lea a le Ao Mamalu o le Malo o le avatu o Tulafono saina e ia. O lea foi la ua outou silafia le tele o Tulafono, o lea la ua iu ai lava ina saina le faitau isi Tulafono ae le o se excuse lene mea. Na ala ona...E i ai le upu foi lele, na ofo lava le fitafita e alu i le taua ona o le lava amo le fana fanua. O le mea la lea, so o se Ao o le Malo e tofi, faitau au Tulafono pe a avatu. Ae avatu Tulafono a oo ina fono le Palemene, faalogologo mai i felafolafoaiga.

O le ala foi lene na ala ai ona faasalalau a tatou Fonotaga, ia faafogafoga uma mai itutino o le Malo, o lea lava ua oo i Faauluuluga o Matagaluega, na faatonuina i le masina o Novema i le 1984, so o se taimi e fono ai le Palemene ia omai Faauluuluga o Matagaluega e faalogologo ma faafogafoga i mataupu e aumai e le Palemene. Aisea? E leai nisi o toe aisili, o Taitai o Samoa ia e iinei. Afai e i ai se mataupu ua laga mai e le malamalama au po o Fiamme po o latou nei, vave le sau o le fasipepa e mafai ai ona matou tali atu ma le atoatoa. O le le faaloalo le tali atu le atoatoa i mataupu e laga mai e outou o tupu ma ee o Samoa lea tatou te nonofo i le Palemene lenei ma fai tonu mo le manuia lautele o le tatou atunuu. O le ala lea e ala ai ona omai latou e faalogologo. O le taimi foi tou te sausaunoa mai ai, e ono le mafai ona matou faamaumauina mea uma tou te finagalo i ai, ae o lea e nonofo mai. A avatu foi la le matou faatonuga, ia latou malamalama lelei i mea e tataua ona fai, o lea ua sausaunoa outou o tupu ma ee o Samoa i totonu o le fonousu lenei a Samoa. E leai se isi fonousu, na o le tasi lava le fonousu a Samoa, o le Palemene lenei, o lea ua atoa i ai tootoouli ma tootoosinasina o Samoa. O lea la tatou te soalaupuleina mataupu mo le manuia au i luma o le tatou atunuu e ao ai ona faafogafoga lelei mai ma faamaumau.

Lau Afioga i le Fofoga Fetalai, i le tulaga la o le tofiaina o le aufaigaluega aemaise o le Failautusi, ua ese le tulaga lea ua i ai le Malo, ua tele galuega, ma e le tataua ona faia pei ni mea foi nei a se aiga galuega a le Ofisa o le Ao Mamalu o le Malo, ia professional ona faatino. O le a le uiga o lea mea? Ia faasalalau aloaia mea nei o avanoa, ia service lelei le Ofisa o le Ao o le Malo, leaga e o atu tagata mai fafo e o atu e feiloai. A o atu la e feiloai, ae o atu e talafeagai lelei. O tagata ia e omai mai fafo, o le tele o isi tagata nei o tagata aaoaina, o polofesa e aveia ma sui o Malo e omai la e asiasi mai i le tatou Malo, e o atu e feiloai i le Ao o le Malo, ae o atu o la e lelei le teu maiga o le Ofisa, fai le iputi, fai lelei le ti o le taeao. O mea uma ia e aafia ai. A oo ina i ai ni mataupu e communicate, e fesootai ai le Ao o le Malo ma sui o latou i fafo, e mafai ona follow up, a ia follow up mai le Ofisa o le Va i Fafo ina ia fesootai le Va i Fafo ae le tusi sao ia. O le mea lene e tele ai mea e tau fufulu ona o le taumafai o le Ao o le Malo e fesootai i fafo ae le o sana matafaioi lene, o le matafaioi lene a le Ofisa o le Va i Fafo.

**Tulafono Tau Faaofi o Teuteuga o le Tulafono o Le Ao o le Malo 2018
– faitauga faalua**

O le mea lena e ala ai ona faatu le Ofisa lea, o fesootaiga e sau i totonu o le Malo, tasi lea auala o le Ofisa o le Va i Fafō, o fesootaiga e agai atu i fafō o le Malo, tasi lea auala o le Matagaluega o le Va i Fafō. Ua uma foi ona tapenaina i latou nei i le ituaiga gagana ma le tomai e fesootai atu ai i Malo i fafō. A o le tulaga lena, e tau fai ma tau nunu ai le toau pe a oo loa ina naunau tele le Ao o le Malo e fia faaali atu foi i fafō lona ia finagalo, a mea o lo o i ai ala o mea, o ala o mea e pei ona faatu mai i le amataga i totonu o tatou Faavae.

Lau Afioga o le tulaga lena e taua ai tele le itu lea, o le ala foi lena e ala ai ona ou fautuaina Minisita, fai ni a outou avetaavale, tuu le mea lea na ou vaai i ai i aso la, e manao le isi Minisita e aumai lona atalii e avea lana taavale. E i ai la le Minisita na alu atu lava lona atalii soa, lavea le taavale ave loa i fafō, na umi lava o taoto i fafō i le mea lava lea o le aumai foi lea o tagata o aiga e avea le taavale. E tatau lava ona professional le faatinoina o galuega.

Lau Afioga i le Fofoga Fetalai, o le tasi lena vaega i le tulaga o totonu. Ua uma ona ou talanoa atu i le itu lea o le Tulafono Tau Faaofi, lea ua teuteu le faaupuga ina ia mafai ona ofi ai i totonu i i, o le Ao o le Malo po o le alii po o le tamaitai, lea la ua kava uma i i le Tulafono lea. O lea e manino le faa-Peretania, ae kava mai i le faaupuga o lona toalua, lea e faaoga ai le nauna lautele o le spouse i le faa-Peretania, a o lea la ua sese le faaupuga lea, ou te le iloa po o ai le faaliliupu, o le upu Samoa e tatau ona tuu i ai, o le 'toalua'. Ia ma le vaega faaii, o le faalupega. O le faalupega e pei ona silafia, o lea tatou te faataua le tatou gagana. E silia ma le 20 tausaga o faatalanoaina le mataupu lena i le Gagana Samoa sa aafia uma ai le toatele o tatou educators, o i latou o lo o i ai le poto faafaiaoga i Niu Sila, Amerika, Hawaii, Tutuila ma i nei i le faatauina o le gagana. Ua alu alu alu faatalanoaga a experts nei i mea tau gagana, ona latou iloa ai lea faatoa malamalama ai lea aua sa fai lava latou e aunoa ma le agai mai i le Malo po o fea o i ai se finagalo o le Malo. Ae faatoa latou iloa ai, e le mafai ona faataua se gagana a se atunuu, se i vagana ua faataoto Tulafono e le atunuu e pulea lea gagana. O lona uiga e tasi lava la le Malo Tutoatasi lea e i ai i le lalolagi, ua tutoatasi, e taua o le Malo Tutoatasi o Samoa e tatau ona ia pulea lana gagana ma faataua. O le ala lea na ala ai loa ona aumai le Tulafono e faataua ai ma faatu loa le tatou Komisi. O le mea ua manino, ua tele atunuu ua alu alu alu muta le latou gagana. Ua le iloa e tagata faaoga le gagana, ua muta, ua pe. A le faaeteete la Samoa, o le mea foi lena e oo i le tatou gagana, o le alu alu alu pe, aemaise le taimi lena pei ua mafui tele tatou i le mea lea o le aoaoina o le Gagana Peretania. A o le gagana a ia a Samoa, e tatau ona faatauina. O ai la e amata mea ia? E tatau ona atama atu ia tatou o taitai o le atunuu, ae amata mai luga i le Ao Mamalu o le Malo. Faataua le tatou gagana i faalupega. E ui lava o lea e faapea mai, e faaoga gagana e lua. I totonu o le Kapeneta, ona o le faatauina o le gagana na fai ai le iuga a i matou o le Kapeneta na taiala ai le toea matua le Afioga ia Tofilau Eti Alesana, faataua le tatou gagana, aua le toe talanoaina ni pepa faa-Peretania, ae talanoa mea tau gagana, mataupu i le gagana Samoa.

05 OKETOPA 2018

**Tulafono Tau Faaofi o Teuteuga o le Tulafono o Le Ao o le Malo 2018
– faitauga faalua**

O le Matagaluega na ou iloa na matua tele le faa-fitauli, o le Falemai. Ua aumai nei la le pepa e fia ave le Minisita o le Falemai i lena taimi ua gasegase i le mea lea o le urinary problem. Na faa-Samoa sao mai lava e le falemai le upu. Toeitiiti atoa le itula o otegia e le matou taitai le Minisita. O lea o le a ave oe ae te le iloa faa-Samoa lau... faaaoga nisi upu foi lele e tau nana ai i lalo le faaletonu o lou gasegase lea o le a ave ai oe. E pei la o le tulaga la lena lea la ua taumafai taumafai lava le Ofisa o le Falemai, o lea lava e tumau i le mea e tasi. O le ala foi lena o lea a ou lauga ai loa, e oo lava i fomai, ua matua le iloa e fomai se gagana. Ua faafia ona ou talanoa i le mea foi lea o le faamai foi lele o le noncommunicable diseases, o le latou faa-Samoa, o le mai le pipisi. E faa-Samoa sao mai lava i le faa-Peretania i le faa-Samoa, ou fai atu, sole, tuu na mea, faaaoga le gagana e malamalama ai, faaaoga le upu o le faamai oti. Ae aua le avea na mea o faamai le pipisi, aua na ona avatu lava i tua i le matou kegi la e i tua i Lepa, ia fai mai loa toeaiina, 'Se e manaia la le mea lea tatou te mamai ai e lelei e le pipisi, tatou toaaga e aai.' O le tulaga la lena i mea tau mai, e tatau foi ona tatou tilotilo i le gagana e faaaoga, gagana tuusao. A outou faalogologo mai o alu atu au polokalame, se ou te musu tele e faaaoga gagana foi ia, se ia manatua, o le 18 tausaga lea e i ai nei po o le 19, 20, 21 fai le palota, a malamalama lelei, e palota uma mai lava i le HRPP. O le ala foi la lena e ala ai ona ou le faaaogaina nei gagana faigata faatoa faaaoga i taimi foi nei o mea o faanofonofo. Ae pei o le agaga lena i toeaiina matutua, o le taimi lava e te saunoa mai ai, e tatau lava ona faalupe mai matou o tupu ma ee o Samoa i matou faalupega. Ou te augata tele e fai na mea, ona e confuse atoa ai le feau lea e taumolimoli atu e le tatou Malo ina ia manino ai le au 19 tausaga ma le au faafafine ina ia palota mai ai pea i le HRPP i le isi foi faiga palota.

O le mea la lea, e faamalulu atu Aeau, ona pau lava o mea faapenei, o le mea taua i Tulafono faapenei, ia malamalama tagata nei e te avea i ai le Tulafono ae le o lou nofo ma faaaoga le gagana e tau atu ai, 'oi, se o le tama e matua pototo lava, ese le maoae o gagana la e faaaoga.' Ae ou fesili atu i ai, o le a la sou manatu i mea ia... ou te matua le malamalama lava i se upu o upu la e tautala i ai.

O le tulaga la lena lau Afioga i le Fofoga Fetalai lea e taua ai le faataua o le tatou gagana. O le ala foi la lena ua faa-Samoa ai le faalupega, tuu ia upu Your Highness. Aua a faa-Samoa ua tatau loa la ona afio mai lau Afioga Hainesi. Ae lelei lava ona faa-Samoa pea lau Afioga. E leai se isi upu e sili atu ona mamalu nai lo upu faa-Samoa. Ona tatou mulimuli ai lea i le trend, le mea lea e fai e le tele o atunuu, faataua latou gagana, faalupe ai lava e le Alapi le latou sifi o le SHIEK, faalupe ai e Siamani le latou tupu silisili sa i ai i na aso, o le KAISA, ia lea e malamalama uma i ai tatou, kaisa. Ae faaupu ai e Rusia le latou sifi i aso la, o le TSAR le sapelaga. Ae faalupe ai e le atu Melesia latou tagata o le ABDULLAH. Ia o la e faaaoga le latou gagana. A talanoa mai foi la le Saina po o le papalagi i ai, e talanoa lava ma tau sao mai, nai lo le tatou o fua faaaoga nei gagana aitalafu mai fafo ma atili le malamalama ai le tulaga o mea, ae pe atu ai ma le tatou gagana.

**Tulafono Tau Faaofi o Teuteuga o le Tulafono o Le Ao o le Malo 2018
– faitauga faalua**

E pei la o le taimi lenei, o lea e matau, a e talanoa faava o Malo i le Sapani, pe te talanoa faavao Malo i le Saina, e talanoa lava latou. Po o le a le saosaoa o le nanu a le Sainapo o le Sapani e pei o le laau suisui, ae oo loa ina talanoa mataupu taua, e le toe talanoa i se Gagana Peretania. O le tele o isi aualii ia e maua o latou Phd mai Iunivesete ia o Cambridge, Havard i Amerika, ae oo mai, e le taitai faa-Peretania, e faa-Saina faa-Iapani, o atunuu tetete. O le ala foi la lena o lea ua faa-Samoa ai, po o le a lava le tulaga, ae oo loa ina tau le Ao o le Malo, e preceed lava pe tomua i lau Afioga i le Ao o le Malo.

Lau Afioga i le Fofoga Fetalai, o le agaga atoa lena o le Tulafono, ia faataua la tatou gagana. Ou te manatu atonu foi e faatiga fofoga, a o le upu lava lenei na faamalamalama atu ai foi e le Faauluuluga o le Matagaluga i le aso ananafi lenei Tulafono ma le auau o le Tulafono o lea lava tatou te taumafai ina ia puepue maua pea, le agaga o toeiina na latou faatuina lo tatou Malo ma latou fausia le Faavae. Aua sa agiga lava i faamaumauga, e i ai le taimi e toe teuteu ai le Faavae, e fai lena e augatupulaga ua latou silafia ua talafeagai. O teuteuga ua latou faia ua talafeagai foi ma lo latou taimi.

Lau Afioga i le Fofoga Fetalai, o le faamalamalama atili lena o le Tulafono Tau Faaofi.

FOFOGA FETALAI: Malo faafetai, o lea ua manino ma malamalama lelei lava le saunoaga a le Palemia e faamanino ai le auga ma le faamoemoe ma le maa faafuagalu, ua mafua ai foi ona i ai teuteuga i lenei Tulafono. O le mea lea, e maua le avanoa o sui mamalu e saunoa ai i le mataupu lenei pe a tatou foi mai i le tatou malologa.

Ae talu ai o lea ua tatou toai taunuu i le tatou malologa masani. Ou te faasilasila atu ma le faaaloalo o le a faataatiaese Galuga a le Fono Aoa mo lana malologa masani.

Na faataatiaese Taualumaga a le Fono Aoa i le itula e 10:47 i le taeao ma toe faaauau i le itula e 11:32 i le taeao.

FOFOGA FETALAI: Ua ou manatu foi ua maua le faasiligamalosia, ua matu i fau le taliga o le sua ma le taumafataga e faaauau ai le galuga.

E faia le malologa ua faapena ona maca le saunoaga faamalamalama a le Afioga i le Palemia, e tusa ai o le Tulafono Tau Faaofi. Ua manino auofala, e matau atu o lo o fia saunoa le sui usufono mo Vaimauga. Tulai mai le sui mo Vaimauga Sasae e saunoa e tusa ai ma lenei Tulafono Tau Faaofi.

Afioga SULAMANAIA FETAIAI TAUILILI TUIVASA (Vaimauga Sasae): Faafetai i lau Afioga i le Fofoga Fetalai. Masalo o lea ua sao i alo le taligasua a le Afioga i le Palemia aemaise o le Kapeneta ma le mamalu o lenei Palemene. O se laolao foi lenei e fia avatu ai foi se sao o lenei itumalo, ona o le taua o le Tulafono Tau Faaofi ua opea nei i le Maota.

05 OKETOPA 2018

**Tulafono Tau Faaofi o Teuteuga o le Tulafono o Le Ao o le Malo 2018
– faitauga faalua**

Ua tele mea aoga sa faalogologo i ai le sui usufono i le malelega a le Afioga i le Palemia i lenei taeao. E avatu ai foi le faatalofa a lenei itumalo i le lato i le tai ma le lato i le ea i le afioga i le Palemia. O lea ua matauina lona soifua laulelei ma ua toe foi mai i fanua, na feagai ai foi ma fonotaga i atunuu mamao, viia le Atua.

Ae o se Tulafono Tau Faaofi o Teuteuga o le Tulafono o le Ao mamalu o le Malo, e avatu ai se motugaafa a lenei itumalo. E so o se tagata soifua lava i totonu o le atunuu lenei, e mimita ma meeme i lona tamaliiaga po o lona faasinomaga, i totonu o lona aiga aemaise foi o totonu o lona nuu e soifua ma ola ai. E faapena foi se lagona o le sui usufono lenei mo Vaimauga i Sasae. I le faatulai mai o lenei Tulafono ina ia suia faaupuga e faalagi ai le Afioga i le Ao mamalu o le Malo, e talia ma le agaga fiafia le faa-Samoaina po o le tuu i ai o la tatou faa-Samoa. A o le faa-Samoaina la lea e fai sina vala ma le auai le sui usufono mo Vaimauga, ona o le a suia mai lana Afioga Mamalu o le Ao o le Malo o Samoa, i le Afioga i le Ao o le Malo, e pau lava lea. O le talitonuga o le sui usufono mo Vaimauga i Sasae, o le Ao o le Malo, e tatou te maafi i ai, tatou te faamatietie, e tatou te ave i ai faaaloaloga ma upu, o seluseluga ma mea faapena o mea maualuluga a le atunuu. Na malele foi le Palemia ananei i le faatauaina o le gagana, ua talia e le sui usufono mo Vaimauga Sasae le tuu i ai i totonu o le faa-Samoaina, aveese le His Highness ae tuu i ai le faa-Samoaina, lelei. Ao le gagana lea e faa-Samoa ai le Afioga i Le Ao o le Malo, o i ina lea e i ai lou popolega ona e pei ua leai se mamalu, o le upu lava lena e ese lou fiafia i ai, Lana Afioga i Le Ao Mamalu, o le mamalu lea ua leai. Ao le Afioga i Le Ao o le Malo, ia seitulou lava le motu lea o Tokelau, e pei lava o se faaupuga foi lea - o le Ulu o Toelau, sei tulou ia tagatanuu. E pei e leai ni lagona.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai....

FOFOGA FETALAI: Malie le sui usufono sei tulai mai le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: E le aveesea lava le mamalu o Le Ao o le Malo, e le mafai ona aveesea e se isi. Sa ou fesili foi i e Tusi Tulafono ae fai mai, ia consistent ma isi faaupuga o lo o agai i ai ia faalupega o Le Ao o le Malo. Po o Le Ao Mamalu po o Le Ao o le Malo, e tutusa lava ia te au. Ae manatua foi la lau Afioga o lea e ave i o i le tatou Komiti, afai e faaopoopo i ai le mamalu lena, e manaia foi. E leai lava se mea, aua pe i ai se mamalu pe leai, ae a ta o lava i totonu o le faaupuga, a o tatou lava lauga e mamalu lava Le Ao o le Malo e le tau faapipii fua i ai nisi mea, e mamalu lava Le Ao o le Malo. E pei foi o outou, pe tau le faipule e mamalu pe le taua, e mamalu lava le faipule ia.

05 OKETOPA 2018

Tulafono Tau Faaofi o Teuteuga o le Tulafono o Le Ao o le Malo 2018
– faitauga faalua

Lau Afioga i le Fofoga Fetalai, i tei ua soona tele ai upu. ae leai lava ni vovoga o i ai. O lea e avatu i o, a avatu foi faaopoopo i ai e le Komiti lena, pe tasi le mamalu pe lua mamalu, afio o Le Ao Mamalu Mamalu o le Malo, pe faatolu, e leai se mea o i ai.

Lau Afioga i le Fofoga Fetalai, ua ou vaai atu e pei o le a tau sela le sui usufono i lenei mea mama, matua mama tele lenei mea ae tau sela ai le sui usufono.

FOFOGA FETALAI: Tulai mai le sui usufono, aua le faamamafa mea faigofie.

Afioga SULAMANAIA FETAIAI TAUILIILI TUIVASA: O le malelega a le Toeaina ia, e leai lava se tala e fai i ai a lenei sui usufono, ona o le sui usufono lenei, o le sui usufono e tautua i nuu ma alalafaga. O le mea foi lena e aumai ai, ta te fia manao e faamatietie ma faamaupuepue le Ao, ua Ao i ai lo tatou Malo. O le upu lava lena mamalu, ao lea ua saunoa le Tama, ia ua lelei. Tuu ifo i lona faletua faamolemole, o lena e i ai le vaega lena e tuuina mai, fai mai e aveese le Masiofo ae tuu i ai le faletua. O le popolega lena o lota sui usufono, e pei o Le Ao o le Malo po o le Masiofo, e pei e onomea lava le upu Masiofo e ave i le faletua o Le Ao o le Malo. O le Masiofo a Le Ao o le Malo. Ae a ave i ai le faletua, e pei ua tuumamaina ifo ai i lalo le tamaliiga o le faletua...

Susuga Hon Tuilaepa Auelua Fatialofa Lupesoliai Lolofietele Neiotei Aiono Galumalemana Dr. Sailele Malielegaoi: Lau Afioga i le Fofoga Fetalai, e tasi foi lena mea e tilotilo i ai la tatou Komiti. Ae pei ina ia malamalama le mataupu, o lea e mulimuli le faa-Samoa i le faa-Peretania, o le faa-Peretania la o le spouse. A tau la le Masiofo, ia e tai pei la o le sui usufono mo Gagaifomauga Nu 1. o lea la ua Ao o le Malo le sui usufono mo Gagaifomauga Nu 1 ma lona alii, ia e le manaia, Afio maia lau Afioga i Le Ao Mamalu le sui usufono mo Gagaifomauga Nu.1 ma lau Masiofo ona tau lea o si toeaina. O le mea la lena o lea na agai i ai le upu, se tatou alu i mea faigofie. Aua a tau le Masiofo ua le taitai ona talafeagai.

Lau Afioga i le Fofoga Fetalai, o le gagana ma le faaaoga tatauina.

Afioga SULAMANAIA FETAIAI TAUILIILI TUIVASA: Lau Afioga i le Fofoga Fetalai, e ese le manaia o lenei taeao, ona a silasila i le Afioga i le Palemia, o la e fai lana ulafala. o le mea foi lena na tapena mai ai le sui usufono mo Vaimauga i Sasae, e fia lauga lava ona ua taua Le Ao o le Malo, manaia lava le ma fesilafaiga ma le Palemia. O le Masiofo lea e popole i ai le sui usufono, e aveese le faletua ua maualalo tele, e na o le Masiofo lava a Le Ao o le Malo ma le Masiofo a le Sui Ao, uma, ao tatou, ia alu ai i faletua.

05 OKETOPA 2018

**Tulafono Tau Faaofi o Teuteuga o le Tulafono o Le Ao o le Malo 2018
– faitauga faalua**

O le Failautusi faamolemole a Le Ao o le Malo, o lea e maua atu i le Fuaiupu 14, o lea e tofia e le Kapeneta, a outou Afioga le Failautusi a Le Ao Mamalu o le Malo. Ae a silasila ia outou Afioga i Minisita, e pule lava outou ia outou Failautusi. A silasila foi i tofiga ia ua i ai Le Ao Mamalu o le Malo, ua faakonekarate ua tofi e tatou Le Ao Mamalu o le Malo. O le talitonuga o le sui usufono mo Vaimauga i Sasae, o le a le mea o le a outou toe tofia ai le Failautusi, lea e i ai le Fuaiupu 14 lena fai mai, o le Failautusi a Le Ao o le Malo, o le a tofia e le Kapeneta.

Susuga Hon Tuilaepa Auelua Fatialofa Lupesoliai Lolofietele Neiotei Aiono Galumalemana Dr. Sailele Malielegaoi: Lau Afioga i le Fofoga Fetalai, leaga o i e alu atu ai tofiga. O le mea lena, o i e alu atu ai tofiga, e le sau i se isi mea. E tatau lava la ona faataoto atu e le Kapeneta aiaiga. E pei foi o Faaululuga o Matagaluega, e pei o le Faamasino Sili, o i e faaii mai i ai mea uma, leaga o i e alu atu ai tupe. Nei tei ua manatunatu tele i na mea, ae a leai le iuga a le Kapeneta e tuu i ai ma tupe, o lona uiga e faalupe i le vao nei mea. Ne i tei ua manatu tele i ai ae galo ai e i ai taupega ia e mafua ai ona fai iuga faapea, o tupe.

Afioga SULAMANAIA FETAIAI TAUILILI TUIVASA: Lau Afioga i le Fofoga Fetalai, o le sui usufono lenei mo Vaimauga Sasae e le taua ni tupe, ae taua le mamalu o le tofiga. O le mea lena e upuia ai tatou, e le tofia Failautusi a le Kapeneta...

Susuga Hon Tuilaepa Auelua Fatialofa Lupesoliai Lolofietele Neiotei Aiono Galumalemana Dr. Sailele Malielegaoi: Lau Afioga i le Fofoga Fetalai, e tatau lava ona ou faasaoa le mea lea. E le o toe maua ni tagata i aso nei e galulue fua. A leai se tupe e leai se isi e galue fua, e oo lava i a tatou Faifeau, e leai lava ma se Faifeau o toe galue fua, e pei o le tulaga lena. O e galue fua? E leai o lena e tofogi. O le tulaga lena, o aso nei ua le toe i ai ni mea o ni free lunch.

Lau Afioga i le Fofoga Fetalai, o le faasaoga lena.

FOFOGA FETALAI: Atonu ai ua manino lea vaega, ae tulai mai le sui usufono e see ese mai i le tulaga lea, e le o toe umi foi sou taimi e tusa ai o lou taimi faatulagaina.

Afioga SULAMANAIA FETAIAI TAUILILI TUIVASA: Ia o le popolega lava o le sui usufono lenei, ona pele ia te au lenei vaega faaupufai. Ona o le mea foi lea e tele ai le faasea a lo tatou atunuu po o le a le mea o le a tofia ai le Failautusi a Le Ao o le Malo ae o Failautusi a Minisita, e pule lava le tagata ia i lana ia Failautusi. E pei o le tulaga lena e tatau ona tatou silasila i ai, aua nei upuia la tatou Faigamalo.

05 OKETOPA 2018

**Tulafono Tau Faaofi o Teuteuga o le Tulafono o Le Ao o le Malo 2018
– faitauga faalua**

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai, sei faasao le sese tele lea.

FOFOGA FETALAI: O lea o le a toe saunoa atu le Palemia e toe faasao le mataupu.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: E alu atu i totonu o le Kapeneta le mea lea e pasia mai ai mea uma, e fai e le Kapeneta. O le faasaoga lena lau Afioga i le Fofoga Fetalai leaga e le i saofai le sui usufono i totonu o se Kapeneta o le mea lea e te le o silafia ai le ala o mea. Ae lelei ona matau mai upu o le ala o mea, e alu atu i totonu o le Kapeneta le faaiuga.

FOFOGA FETALAI: Ua manino lea tulaga, ma ou te le toe faatagaina foi e toe taua i le saunoaga a le sui usufono mamalu. O le faamalamalamaga a le Malo, o le faamalamalamaga lena tatou te agai i ai, e tusa ai o lo latou finagalo. E toasefulutolu i latou ae toatasi foi le sui usufono, o lou lava lena finagalo e tusa ai o lau silasila i le Tulafono Tau Faaofi.

Tulai mai le sui usufono.

Afioga SULAMANAIA FETAIAI TAUILIILI TUIVASA: A faauilavea soo foi i se mataupu ua galo foi manatu. Ona i ai lea o le manatu i lenei itula, na o ni nai motugaafa e tuuina atu i ina i lau Afioga i le Palemia. E tatau lava ona avatu nai fautuaga, aua a sae ifo lo tatou sa, o la tatou te i ai uma i totonu. E faamalulu atu foi pe afai ua i ai se lafoga a lenei sui usufono. O le sui usufono mo Vaimauga i Sasae, na ona futifuti lava ma tuuina atu ia te outou le faamoemoe.

Ae o le suiga o le Fono Aoao, i le vaega lea ua i ai, ua aveese le Fono Aoao Faitulafono, ao lea ua tuuina atu i le Matagaluega o lea faatoa... E faapea lava au ai o le a aveese ai le Fono Aoao lenei a lo tatou Malo, ae leai, o le tulaga lea e i ai o le faamatuuina atu o le faiga o totogi ma le auunaga i o i le Matagaluega a le Palemia mai le Matagaluega lenei o le Fono Aoao lea sa i ai. E pei la o lea faatoa ou vaai lelei atu, ae le o lelei le aumaiga o le faaupuga i totonu i le... aua o lea e i ai le faaupuga fai mai ua suia le Fono Aoao Faitulafono i le upu Matagaluega. O lea e faapea au ia ai o le a aveese le Fono Aoao ae alu tatou i se Ministry foi lea pe i lalo o le PSC.

Ae lau Afioga i le Fofoga Fetalai, ua uma ai i i so matou manatu, ia manuia le fonousu a lou atunuu.

FOFOGA FETALAI: Malo faafetai. Ia e pau lava si itu e manatu le Fofoga Fetalai se i oo i ai se faapupulaga, e faamalulu atu foi i le sui usufono mamalu mo Vaimauga Sasae i le saunoaga, i le faauilavea, upu ia o le faauilavea soo o le Malo, i le tulaga o outou saunoaga.

05 OKETOPA 2018

**Tulafono Tau Faaofi o Teuteuga o le Tulafono o Le Ao o le Malo 2018
– faitauga faalua**

E leaga o le tatou Tulafono, e mafai e le Malo ona tulai atu i so o se taimi e faasao ma faamalamalama se mea o faapena ona laga e sui usufono mamalu. Ia, o a tatou Tulafono Tumau ia.

Ia ae talu ai ona o lea... Malie le sui usufono... E te fia saunoa Taefu? Tulou, o le a faaauau lau saunoaga se i tuu atu le avanoa i le Afioga i le Palemia mo se lafo e tusa ai o le tatou...

LAFO MO LE TOLOPOINA

Susuga Hon TUILAEP AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI: Lau Afioga i le Fofoga Fetalai, ou te tulai atu e faatu le lafo, *Ina ia tolopoina nei taualumaga a le Fono Aoa seia aulia le Aso Lua, 18 Tesema 2018 i le taunuu ai i taimi masani.*

Faaluaia e le Sui Palemia ma le Minisita mo Pisinisi, Alamanuia ma Leipa.

Na faamaonia le lafo.

Na toe faaauau felafolafaiga i luga o le faitauga faalua o le Tulafono Tau Faaofi o Teuteuga o le Tulafono o Le Ao o le Malo 2018.

FOFOGA FETALAI: E muta le tatou Galuega i le 12:00 i le aso, ona faapena lea ona tolopo e tusa ai o le tatou kalena fono a le Palemene e pei ona faatulai mai i le aso ma le taimi e pei ona faatulai mai e le Afioga i le Palemia e auala mai i le lafo ua pasia.

Ia o lo o i ai nai minute ia e faagasolo ai le tatou galuega.

Se i tulai mai le sui usufono mo Faasaleleaga Nu.4.

Afioga PESETA VAIFOU TEVAGAENA (Faasaleleaga Nu.4): Faafetai mo le avanoa i lau Afioga i le Fofoga Fetalai, ua taliga fia faalogo foi i lenei taeao fou i le matagofie o lenei Tulafono Tau Faaofi. Ma o se Tulafono Tau Faaofi ua tatau ma onomea lenei teuteuga, ae o se Tulafono Tau Faaofi foi tatou te faamautuina ai le Faavae o Samoa, Faavae i le Atua Samoa.

Lau Afioga i le Fofoga Fetalai, ou te faafetai i le Afioga i le Palemia, faapea foi le Matagaluega i le tapenaina o lenei teuteuga o le Tulafono, ona o le Tulafono Tau Faaofi e le taugofie i le toatele o le atunuu. O lea o lo o faafogafoga uma Samoa i le teuteuga o le Faavae lenei ona o le Ao o le tatou Malo.

Tulafono Tau Faaofi o Teuteuga o le Tulafono o Le Ao o le Malo 2018
 – faitauga faalua

O lea ua aumai e lenei teuteuga ua aveese ma soloia ai le upu mamalu. Ma ou te faafetai i le Atua i le taeao lenei, o lea ua toe faafoi lava le mamalu ia te la, leaga o le mamalu e le o se tatou mea, o le mamalu o mea ia a le Atua. O lea ua tulaga i lagatonu le faataotoga o le Faavae, leaga o lea lava e manino lava.

Afioga Sulamanaia Fetaiai Tauiiili Tuivasa: Lau Afioga i le Fofoga Fetalai na o se fesoasoani atu ona o lea e...

FOFOGA FETALAI: Se i tulai mai le sui usufono mo Vaimauga Sasae.

Afioga Sulamanaia Fetaiai Tauiiili Tuivasa: E saunua atu le Sui Minisita Lagolago a le Palemia. E pei e maitau ona o lea ua toe saunua mai lava ia i le la Tulafono ma le Tocaina. Ia ae a pe a alu ifo i se taimi e faafetai ai lava ia i le laua Ofisa o laua e ona le Tulafono.

Ae ou te fia faamanino i le sui usufono lea ma ou faamalamalama le eseese o le mamalu, leaga o lea ua talanoa le sui usufono lea i mamalu. O le mamalu e mafai ona mamalu se saofaiga, ae le paia. O le paia, o le paiaaga, pe a i ai le manaia o le mamalu. E mafai lava ona mamalu se mea ae le paia.

O lea la, o le mamalu lea e faalupe ai lo tatou Ao, ae o le paiaaga, o le aufaigaluega paia lena a le Atua lea e tau sau ai le sui usufono. O le sui usufono lea, e eseese le Tusi Paia lea e fealuai ma le sui usufono. E pei o le mea lena e mimita ai le Palemia i lana Sui Minisita ae leai e sese le Tusi Paia la e faaoga e lana sui. Ma le faaaloalo lava.

FOFOGA FETALAI: Ia malo faafetai, ia se i tulai mai le sui usufono, ou te manatu e le umi foi sau saunouaga.

Afioga PESETA VAIFOU TEVAGAENA: Leai, ou te le o i ai se tulaga ou te le faagaulemalie ai i lou uso a sui usufono. Pau lava lea o sau fautuaga ia te oe lou uso, faitau ia maeaea lelei le Tusi Paia lena na avatu.

O le upu mai i le Feagaiga Fou i le tusi lea a Isaia, sue ifo i le Isaia e 42 fuaiupu e 8, lea e manino lava i i lena upu, "*I am the Lord, and that is my name, and I will be my glory.*"

Afioga Sulamanaia Fetaiai Tauiiili Tuivasa: Lau Afioga i le Fofoga Fetalai, o se mea e fia faasao, o le Isaia o le Feagaiga Tuai, ae o lea e saunua mai se i sue ane le Isaia i le Feagaiga Fou. E pei o nai mea na lea ou te fai atu ai, e sese le Tusi Paia lea e faaoga ma le faaaloalo leaga o la e faafofoga le atunuu, i upu lea saunua ai le Minisita Lagolago o le Matagaluga o le Palemia, o le Feagaiga Tuai e i ai le Isaia faamolemole. Ma le faaaloalo.

FOFOGA FETALAI: Faafetai lava. Ia, ua maua foi e le sui usufono le mea sa e maua ai, o lea la ua e saunua, ua sola manatu ina ua faauilavea soo.

05 OKETOPA 2018

Lafo mo le Toe Faaauauina o Itula Fono

Ia o lea foi ua tau sola le finagalo o le sui usufono se, ua e faauilavea soo foi le sui usufono mo Vaimauga Sasae.

Ia ae ui i lea, ia alo e faamaea mai le saunoaga.

Afioga PESETA VAIFOU TEVAGAENA: O le mea lea ua mafua ai ona sola foi manatu, o lou faalavelave soo. Ae o le mea sili lea ua e faalogo mai i le upu lea. *“O au o le Atua o lou igoa lena. Ou te le avatua lou mamalu i se tasi, ou te le avatua foi le viiga i se tupua ua ta.”* Ua e vaai la i ai i le manino lelei o le Tulafono? O lea lava e manino. Ae a tatou o foi i le Tusi a Roma i le upu a Paulo, e leai lava se isi o tatou tatou te oo i le mamalu o le Atua, o upu na a Paulo. Aisea? E leaga o tatou o tagata agasala. Roma e 3 fuaiupu e 23...

FOFOGA FETALAI: Malo, se i mama ia le sausau....

Afioga PESETA VAIFOU TEVAGAENA: Leaga e tataua ona ou avatua e silasila lelei i ai. O le mea lea lau Afioga i le Fofoga Fetalai, o le ala lea na ala ai ona ou manatu e fia avatu sau mau e lagolago ai le Tulafono, ona o se Tulafono e taua.

O lea ua aumai nei o le Ao o Le Malo, aua o lea ua manino foi sui usufono mamalu uma o le Maota, ua le na o Tama a Aiga o le a filifili i ai lenei tofiga maua. O lea lava ua soo se isi, ana o le Ao foi, po o le Faa-Ao foi, ioe, e pei o le Faa-Ao o le Ekalesia.

O lona uiga, ua matua tataua ma onomea lenei suiga, ma e ou te faafetai foi i lenei vaitau ma lenei foi vaitaimi, tasi lenei suiga i lo tatou foi taimi. Ioe, e pei lava ona saunoa le Palemia i le tele o taimi, aua tatou te fefefe e fai suiga. O lona uiga lau Afioga i le Fofoga Fetalai, ua matua lagolagoina e lenei itumalo lenei suiga, ma lou faaaloalo lava.

FOFOGA FETALAI: Malo faafetai. Ia se i tapa le Afioga i le Palemia i se lafo e tusa ai ma le tatou mataupu.

Tulai mai lau Afioga i le Palemia.

LAFO MO LE TOE FAAAUAUINA O ITULA FONO

Susuga Hon TUILAEP AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI: Lau Afioga i le Fofoga Fetalai ona o lea ou te matau ne i te i foi ua i ai nisi sui usufono e fia lauga faa-Faifeau i le aso, *Ia ae pe tuu pea i ai sina avanoa se i faauma latou lauga na saumi mo le Aso Sa ae lea laa faaali i le aso, ia ona tuua ai lea o le tatou Fono se i faamaea e le toe umi.*

FOFOGA FETALAI: Malo faafetai, ia masalo foi e le toatele ni sui usufono e fia saunoa aua o lea ua manino le Tulafono.

Tulai mai le sui usufono mo Falelatai ma Samatau.

Tulafono Tau Faaofi o Teuteuga o le Tulafono o Le Ao o le Malo 2018
– faitauga faalua

Afioga TAEFU LEMI (Falelatai & Samatau): Malo faafetai lau Afioga i le Fofoga Fetalai, e faatalofa atu foi i le paia o le Maota i ona tulaga faalupe. Ua tasi nei le tausaga, 2 masina ma aso e 17 talu ona faatauto le Ao Mamalu o le Malo o i ai nei, ae ua talu mai lea aso, ia ua feoloolo lava nai Tulafono ia ma nai vaega ua talanoaina ai. E pei e tauoso ai foi le matamuli i nisi o taimi. Ui o lea, e vaai lava i le itu lelei o le faamautuina ma le faamausaliina atili o le Ofisa o le Ao Mamalu o Le Malo.

Ia lau Afioga i le Fofoga Fetalai, o le ala lea ua manatu ai e tulai atu e fai sina vaivaiga laitiiti e tusa ai o le Tulafono Tau Faaofi. E manatu lava o le Tulafono ua leva na i ai, o fetuuaiiga foi ua tatou faia i lenei vaitau, o fetuuaiiga lava ina ia mausali ma lelei atili ai le Ofisa o le Ao Mamalu o Le Malo.

Ia e pei lava ona tatou maitau i le Televisi ma le faatinoga o tiute ma faiva o le Ao Mamalu o Le Malo, o le tauaaoina o pepa mai sui o isi Malo. Ia e autilotilo lava i ai i nisi o taimi, e tau maitau atu le faatinoga, ia e tele lava ina tulai ma faatino. Ia ou te leiloa pe faasa ona nofo lelei i lalo ia aemaise o le tulaga o faatino ai o le fata po o le pulelaa e faatino ai, e le o matagofie i le maitau atu, ae background mai e nofoa i totonu o le fale, ia o nofoa tuai e tau matamuli ai.

FOFOGA FETALAI: E faamalulu atu i le sui usufono o lo o saunoa, leaga e masalo i se taimi e le o toe mamao ona tuumuli lea o le Afioga i le Palemia i nisi o aafiaga ma tuatuagia ae o lea na faatu mai le lafo ina ia faapena ona faaaau le tatou galuega ina ia pasia le faitauga faalua o lenei Tulafono Tau Faaofi, ia ona tatou tolopo lea seia aulia le Aso 18 o Tesema e fua i ai finagalo o sui usufono mamalu.

O le mea la lea, se i faaluaina mai e le Kapeneta le Afioga i le Minisita mo Pisinisi ma Alamanuia ia le lafo ina ia faaaau ia le tatou galuega seia faitau faalua, pasia le faitauga faalua o le Tulafono lea, ona tuuina atu lea i le Komiti o le Palemene, e galulue ai ma toe lipoti mai, ia ae faamalamalama le tatou galuega seia aulia le aso 18 e pei ona faatuina mai le lafo muamua, e fai ma fuafua i ai le saunoaga a le sui usufono.

Faaluaina e le Minisita mo Pisinisi, Alamanuia ma Leipa.

Afioga TAEFU LEMI: Ia malo faafetai, e le o tele foi se... Pau lava lea o le agaga maualuga, ia e fia tilotilo pea i le itu lelei o nei suiga ina ia faamautu atili ia le faatinoga o le Ofisa ma le auaunaga o faatino mai e le Ofisa o le Ao Mamalu o Le Malo.

Ia o le faaupuga lava ia o le Ao o Le Malo, ou te talitonu lava o se mea ua leva ona taoto ai. O le Head of State pe a faa-Peretania, ia ae o lea ua tatou taumafai nei e suia. E oo lava i le lomiga faa- Peretania o le Tulafono, o lea lava la o le a tuu i ai le Ao o Le Malo.

05 OKETOPA 2018

Tulafono Tau Faaofi o Teuteuga o le Tulafono o Le Ao o le Malo 2018
– faitauga faalua

Ia ona alu ifo lea i le vaega lona 3 o lona Tulafono, lea e i ai le definition. O lona uiga la o le a define ai loa i ina le Ao o Le Malo, ia ma o tatou foi ai lava i le faaupuga lea The Head of State, ina ia... aua e lua lava gagana nei tatou te faaaogaina. O le Tulafono i lona faa-Samoa ma le tulafono i lona faa-Peretania. O le ala la lea e manatu ai, ia a oo lava ina define le Ao o Le Malo, i le Tulafono i lona faa-Peretania, e tatou te toe foi lava i le upu lea, The Head of State.

Ia ae o nai manatu e faatupu manatu pe a faapea e liuliu le tofa i le Komiti ma tulaga faapena ia ae leai e le o tele se lagona lau Afioga. O le Ao Mamalu o Le Malo o i ai nei, e tasi lea o sui e faafofoga mai ma tapuaia le fonousu a Samoa, i taimi uma e tauaofia ai le fono mamalu a le Palemene. E iloa i lou ulufale atu i le Ofisa, ia o lo o leotele ai lava le fofoga o lau Afioga i le Fofoga Fetalai ia aemaise foi o le tatou Palemene i le leitio o faalogologo i ai ma faafofoga i ai le Ao o Le Malo.

Manuia tele le fono a Samoa, manuia foi le faigamalologa a le tatou Palemene seia aulia le aso e pei ona tolopoina i ai, faafetai.

FOFOGA FETALAI: Malo. Se i tulai mai le Afioga i le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai o lona ua manino atili i le saunoaga a le sui usufono, o le faaupuga lona o lea e i ai i le tatou Faavae. O lea la e tausisia e pei foi ona avatu muamua o la e aumai e latou i le tusi Tulafono e tatau ona tausisia faaupuga o i ai i Tulafono aemaise le Tulafono Faavae. Lea foi la ua toe agai i ai le sui usufono ua faamaui atu nei lona tootoo, e toe faamanatu mai ai, o upu na o la e i totonu o le Faavae, Ao o Le Malo. E le gata i le faa-Peretania, Head of State ae faapea foi i le faa-Samoa. O lea la e tausisia lava upu na tuu i ai e o tatou tuua o latou ia na fausia le Faavae. Ae pei o mea lava na, o tatou lava tifiga foi nei tatou te nonofo lava ma faapoopo i ai mea e le o i le Faavae, ia ma faapoopo i ai le mamalu ae pei la o le mea lona ua te i ai le sui usufono lea sa ia laga le mataupu, nei faapea e i ai se uiga alualua, o lea e faafofoga mai le atunuu. E le o ni faaupuga fou, o faaupuga tuai lava na tuu i ai e o tatou tuua, e ogatasi lava le faa-Peretania ma le faa-Samoa, lea ua toe faamanatu mai e le sui usufono mo Falelatai lea faatoa mavae atu nei lona tootoo ina ia manino atili.

FOFOGA FETALAI: Malo faafetai. Ia, atonu toe pau lea o le sui usufono, o lo o ua tapena mai e fia saunoa, o le sui usufono lea mo Salega Sasae ona tuuina atu ai loa lea o le fesili.

Tofa OLO FITI AFOA VAAI: Faafetai i lau Afioga i le Fofoga Fetalai, e le umi foi se manatu o lenei itumalo e tusa ai ma le Teuteuga foi o le Tulafono Tau Faaofi. O lea foi e maua o lo o tuatuagia foi nisi foi i tulaga o tiute ma galuega.

**Tulafono Tau Faaofi o Teuteuga o le Tulafono o Le Ao o le Malo 2018
– faitauga faalua**

E ui lava ina pei e faamalie foi i nisi o taimi ma tau faataaloga i vai foi le tulaga o lenei Tulafono Tau Faaofi, aemaise lava i le Teuteuga o le Faavae, ae ao lava ona tatou tapenapena lelei i Tulafono faapea e aafia ai tofiga mamalu o le atunuu. E tatau lava ona aumai se avanoa i lo o le faanatinati o le Tulafono Tau Faaofi.

FOFOGA FETALAI: Se i ou toe pai atu lava i le itu lea lau Afioga i le sui usufono mamalu leaga o la e faafofoga tapuai mai le atunuu, a o le faiva alofilima lea o le Fofoga Fetalai o le tausisia o tatou Tulafono Tumau, aemaise foi o le faagasologa o a tatou galuega. Ua malele ma saunoa le Palemia o fatia ua sola ma tausaga ua mavae i taimi foi sa ou Fofoga Fetalai ai au, o le taimi lava o le taeao e tufa mai ai Tulafono o le taimi o le taeao o lea faatoa tatou usu mai i lenei vaiata ona faapena lea ona faagasolo. O le taimi lenei, o lea ua fai le tatou Pre Sitting, ia, pei o ananafi ae o le aso le Fono ina ia faapena ona manino ai ma faamalamalama e latou o lo o faamalamalamaina mai le Tulafono Tau Faaofi. O lona uiga la, na alu le po anapo ma le aso ananafi ma le aso a o le faalavelave, ou te faamalie atu i le sui usufono mamalu, ou te le i vaai i lau Afioga i le aso ananafi. E ui i lea, e le avea lou le auai ma mea o le a e faitio ai i lenei taimi.

O le mea la lea ou te faamalulu atu ai i lou uso, aua leaga e tofu lava le tagata ma ana mafuaaga. Ia tulai mai le sui usufono e saunoa faamolemole.

Tofa OLO FITI AFOA VAAI: Ia, faafetai. E leai e usitaia lava e le sui usufono mo Salega lau saunoaga i le tulaga faapena, ae pei lava o malae ia Fono Faitulafono e toe sasaa ai le fafao ma le faaaliga o finagalo i itumalo, o la e foi e taputapuai mai itumalo. E ui o lea, o le a lolo lava se manatu o lenei itumalo i le tulaga pei ona e saunoa. Lau Afioga, e pei e taaina se vaivaiga o lenei itumalo i faiga faavae faaleaganuu a tatou o lo o taitaia ai foi le tatou Palemene nei i le mea lea o le faalupeina o tagata taitoatasi i le tulaga lea ua ou vaai atu nei i le aveesea o le upu ‘mamalu’ mai Lana Afioga Mamalu O Le Ao o le Malo, ou te manatu ua tagatasi uma lava tatou i le Afioga, ua leai se maualuga ifo po o lea ua ta tutusa. Ae a silasila lau Afioga ma le mamalu o le Maota i le faalupeina o nuu ma alaafaga i o latou faalupega, o la e manino lava, e ese lava le tulaga Sao, ese le tulaga Maopu, o faleupolu ma tulaga faapena. E pei la o lau tilotilo lau Afioga ona o le faiga faavae e sosolo le Palemene lenei i lana aganuu ma lana tu, ua ou iloa ua le talafeagai.

O le isi vaega lau Afioga i le Fofoga Fetalai, o le popolega o lenei itumalo, ona o lea ua sui mai le Head of State ua faa-Samoa agai i le Afioga i le Ao o le Malo. Ou te talitonu o le matua tele tatou Tulafono o le a aumai nei e toe fai teuteuga i le aveesea o upu ia, i le toe suiga o le upu Head of State i le faa-Samoa. O lona uiga e lau mai lau mai tatou Tulafono o le matuai tele o galuega o le a tatou agai i ai. Ia o le sui fua lava, a o le tulaga lenei lau Afioga i le Fofoga Fetalai.

05 OKETOPA 2018

**Tulafono Tau Faaofi o Teuteuga o le Tulafono o Le Ao o le Malo 2018
– faitauga faalua**

O le mea lea i le Ofisa o le Head of State po o le Ao o le Malo, ia na o se tuualalo ona o lo o i ai le tatou Matagaluega foi lea le Law Reform lea e toe silasila i Tulafono, pe le talafeagai lena e avea ma arm o le Ofisa o le Ao o le Malo e fesoasoani foi i le Ao o le Malo, aua o Loia uma lava na e i totonu o lena vaega e latou te toe silasila i Tulafono e pei ona tuuina atu e le Palemene.

Ia, ma lau fesili mulimuli lau Afioga i le Fofoga Fetalai, po ua uma ai i i teuteuga o lenei lava mea o le Ao o le Malo, aua o le talafaasolopito lenei o le lalolagi atoa ma Samoa i lenei Paeaiga, e tofu lava le Fono ma le teuteuga o le Ao o le Malo. Po o le mea ua uma ai po o i ai nisi mea ae ua leai se eseeseega foi lea o le upu e to ia te au, ma le laau foi lele e faagata mai lavaua leai ni lau, leai ni lala, toe lava o aa mea lea e totoe. Ma le agaga faaaloalo faafetai.

FOFOGA FETALAI: Malo faafetai. Ia manatua foi e le sui usufono mamalu o se laau ae tapue ma teuteuina, fai mai le faatusa a le Tusi Paia, e fua tele mai, fai mai, e pei o le laau e toto i tafatafa o le vaitafe, ioe, po o le a le tetele o le mugala, e le toulu ona lau aua e faasusuina e le vai. Ia o le eseeseega lena, toaga e faitau po o sao lena Tusi Paia e te faitau ai.

Ia, talu ai ona o lea ua tatou oo mai i sui usufono sa fia saunoa, ia o lea lava ua manino auofala e pei lava foi ona saunoa le Malo, ia o le uiga lea e mafua ai ona fai ma faauilavea le Malo i a tatou felafolafoaiga ina ia faigofie ona maua le faamalamalama ma le faasaoga i mea o lo o faapena ona laga mai e sui usufono mamalu. O le mea la lea, ua matauina ua maea ona saunoa faamalamalama le Palemia i mataupu uma lava sa laga mai e a outou Afioga, se i vagana ai se isi mea e fia saunoa i ai ma malele le Afioga i le Tamaitai Sui Palemia, le Afioga i le Sao Faapito...

Ia malie le sui usufono o lo o tulai mai si ou uso, ona o lea ua fai lata faaiuga, o le toe sui usufono lea pei ona tulai mai ai le sui usufono mo Salega Sasae. Pe ni a fa au ina ne i ou toe fefoiai i lau faaiuga ona tauvalea ai lea o le nofoa o lou uso ae...

Tofa Lealailepule Rimoni Aiafi (Faleata Sisifo): E le afaina lau Afioga. Ia manatua foi o le mea lava ia o le Faavae e seasea sui. E aoga foi le faafofoga mai o le atunuu o tatou lagolago ma avatu ni timaiga foi nei. Ae le afaina, o le a ou usitai e tusa ma lou finagalo, ioe. O oe o lou tama e le o oe o sou uso. Ia faamanuia le Atua ia te oe.

FOFOGA FETALAI: Faafetai. E tau e le Atua lou agalelei. Faafetai. Ia faamanuia le Atua i si ou uso.

Ia tulai maia lau Afioga i le Sui Palemia.

**Tulafono Tau Faaofi o Teuteuga o le Tulafono o Le Ao o le Malo 2018
– faitauga faalua**

Afioga Hon FIAME NAOMI MATAAFA (Sui Palemia): Faafetai i lau Afioga i le Fofoga Fetalai. Ua tulai atu le Taitai ona o nisi o tuatuagia le maalofia o lo o manaomia ai le auai atu i ai. Ae ou te manatu o lea ua faagasolo le faitauina o le Tulafono lea o le Teuteuina o le Faavae. Ma o ala lava o mea, o le Teuteuga lava o le Faavae e tatau ona ave i le Komiti, ma ua i ai foi taimi e faatulaga ai pei foi ona silafia e lau Afioga ma le Maota. Atonu o i ina o le a maua ai foi le avanoa e autovaa atu i ai, e le gata i sui usufono mamalu o le Maota, ae faapea foi le atunuu o lo o faafofoga tapuai mai i mataupu o lo o faapena ona talanoaina i totonu o le Maota o le Fono Faitulafono.

Ou te manatu lau Afioga i le Fofoga Fetalai o lea ua iu ai i i galuega o le tatou aso faatulagaina, o lea foi ua maea ona faamaonia le lafo i le toe tauaofia o le Fono i le aso e pei ona atofaina. Ma le faaloalo lava.

FOFOGA FETALAI: Malo faafetai saunoa i lau Afioga i le Tamaitai Sui Palemia. Ia, ou te faamalulu atu i sui usufono mamalu uma, e tele sui usufono mamalu o lo o tulai mai e fia saunoa, a o le tatou Tulafono e pei ona saunoa le Afioga i le Sui Palemia, o Tulafono faapenei, e foi lava i le Komiti ona agatonu ai lea o le tulaga o outou finagalo, i nisi o teuteuga e faapena ona auala mai i le Komiti ae le gata foi i lea o le faafofoga tapuai mai a le atunuu. E faapena ona maua avanoa pe afai e tuuina atu lenei Tulafono Tau Faaofi i le Komiti a le Palemene latou te tagofia ma iloiloaina.

O le mea la lea, ou te momoli atu vaimalu i puega.

Na faamaonia le lafo ma faitauina le Tulafono Tau Faaofi o Teuteuga o le Tulafono o le Ao o le Malo 2018 i lona faitauga faalua.

FOFOGA FETALAI: E tusa ai ma Tulafono Tumau, o le a tuuina atu le Tulafono Tau Faaofi o Teuteuga o le Tulafono o le Ao o le Malo 2018 i le Komiti o Tulafono Tumau, Mataupu Tau Faiga Palota, Talosaga ma Tofiga Faale-Faavae mo le iloiloaina ma toe lipoti mai i le Fono Aoao i se fonotaga o lumanai.

Ia, ona o lea ua maea ona faatu le lafo ma ua pasiaina, o le a tolopo ma faamuta le tatou Galuega i le aso scia aulia le Aso Lua, 18 o Tesema i le tausaga nei tatou te toe tauaofia ai ma fonoa le Fonotaga a le Palemene.

Ae tatou te le i tolopo o le a ou faaiuina le tatou Fonotaga i se tatalo.

Na tolopo Galuega a le Fono Aoao i le itula e 12.14 i le aoauli scia aulia le Aso Lua, 18 Tesema 2018 i le itula e 9:00 i le taeao.